

四庫全書

史部

欽定四庫全書

史部

江西通志卷六十四

詳校官監察御史_臣左周

檢討

_臣德生覆勘

總校官知縣_臣

楊懋珩

校對官典簿_臣

劉景岳

謄錄監生_臣

陳賓

欽定四庫全書

江西通志卷六十四

名宦

南康府

唐

申稷大厯中為建昌令政平訟理流民復業鄰邑慕之
來歸者衆戶口日增乃分修智鄉置新城鄉

林志

韋遂元和中令建昌為政清簡處事寬和田野闢戶口

增乃分孝弟鄉與靖安里為二鄉

同上

崔迅會昌中令都昌公勤撫恤始成井邑民甚賴之

同

上

何易于會昌中攝建昌令政教有方築堤防水民享其
利民歌曰我有父何易于昔無儲今有餘

明一統志

陳杲字可大咸通中知都昌縣民苦水患築長堤以障
之自是民賴以安名其堤曰陳堤

林志

孫永咸通中為建昌令築堤捍水造橋以渡民甚便之

明一統志

邵師裕咸通中為建昌令以德治民鄰境慕之多來歸

附故老以下鄰名鄉蓋取王翰卜鄰之意

豫章書

南唐

朱弼南唐時為廬山國學助教動持禮法每升堂講釋
生徒環立執經問難應聲解說莫不造理諸生咸服
四方肄業者多造焉

明一統志

李善道南唐時為廬山國學主教學徒數百人皆為時

望今祀於白鹿洞

南康府志

宋

洪沂慶歷初知都昌縣教民以陶瓦代竹一邑便之不
週歲民安物阜政事一新邑人為立坊曰新政

林志

魯有開字元翰參知政事宗道從子也用宗道蔭知韋
城縣尋知南康軍有古循吏風代還熙寧行新法王
安石問江南何如曰法新行未見其患當在異日也
以所對乖異出判杭州官至中大夫卒

宋史

陳舜俞字令舉浙之嘉禾人熙寧三年以不奉新法且上章自疏謫監南康軍酒稅五年而卒凡名勝多所

題詠

林志

徐師回元豐中知南康軍性耿直設施有條公暇建亭於明月泉上曰吾欲守廩如此水之清又建堂植八杉號曰直節曰吾欲守節如此杉之直蘇子由為記後朱元晦至求其遺跡不存獨廳事南有堂無額庭中有老柏生意殆盡而屹立不僵因取直節名堂焉

豫章書

朱熹字元晦一字仲晦徽州婺源人紹興十八年進士
淳熙五年知南康軍至郡值歲旱講求荒政多所全
活閒詣郡學引進士子與之講論奏復白鹿書院創
立學規人皆遵守明年大旱應詔條具民間利病除
提舉江西常平茶鹽公事旋錄救荒之勞除直秘閣
以前所奏出粟人未推賞辭歷官寶文閣待制致仕
卒年七十一謚曰文寶慶三年贈太師追封信國公

紹定三年改徽國公淳祐初從祀孔子廟廷有文集

百卷生徒問荅八十卷別錄十卷

宋史

王休字子美授南康軍僉判郡素號江東道院朱文公
為守日課諸生講書休亦相與發明事無鉅細悉以

委之

樓攻媿集

錢聞詩淳熙間知南康軍博覽經書崇尚儒雅撮新書
院修築石堤復釋菜之禮增養士之田士民戴之

林

志

朱端章淳熙間知南康軍寬以愛民廉以律已撥設官田七百餘畝於洞學以贍四方之來學者

同上

張南金慶元二年為星子令廉明純正號令詳審案牘嚴肅囹圄空虛邑內藹然有禮讓之風累官至戶部

侍郎

林志

王仲傑慶元初知星子縣嘗督創白鹿書院朱子稱其老成忠厚民甚愛之

安志

黃桂嘉定間知南康軍築左蠡城

府志

趙師夏嘉定間知南康軍奏以星子縣請分稅錢對補
上供撥梅洞等田及魚池入三縣社倉善政甚多

豫

章書

陳安字師復丞相俊卿之子少嘗登朱子之門嘉定七
年入監進奏院上封事言宮中宴飲無節非時賜予
丞相史彌遠不樂出知南康軍詣史彌遠別彌遠曰
子言甚切當第愚昧不能行殊自愧耳至官歲大侵
奏蠲其賦什之九會流民羣集安就役之築江隄而

給其食時造白鹿洞與諸生討論改知南劍州

宋史

張處字子安慈谿人慶元進士遷秘書丞改著作郎以疾乞外出知南康至郡剖決滯訟衆皆悅服前守陳安以錢七千緡置濟民庫為築城費處至曰不必取贏於民吾捐萬緡為倡繼事倘不已何患事之難成轉運使以錢萬二千緡置平糴於郡處復出錢萬二千緡以增益之民賴其利將增建禁旅營地屬民者索質劑視元直償之徙知處州歷官工部侍郎兼國

子祭酒

同上

陸德輿淳祐間知南康軍亟議賑恤以郡有累年蓄積
羨餘錢築倉以儲之名曰淳祐義廩民多賴焉

林志

陳淳祖知南康軍造福星臨津定波倉步四門修五老
門築儒良隘增益兵糧倉重建滄波觀作水亭稻亭

功蹟甚多

林志

素從修寶祐間知南康軍表章忠義修靖康死難忠臣
張忠確公叔夜墓以冰玉諸公附祀後從祀於二賢

祠安志

趙與夔景定間知南康軍覈實社倉復還原額修軍學
二祠堂繕治城池造軍衣弓矢旗幟等器百廢俱興

豫章書

劉溥漢咸淳間知南康軍首行淳熙荒政捐俸振貧節
用買田置惠民倉撥廢寺田穀助星子縣月解軍糧
創白鹿洞貢士莊修流澌橋愛民重士興利補弊善
政為多

明一統志

元

陳炎酉至元間為南康路總管修築白鹿書院興學賑
饑招集流亡四萬餘口有麥秀兩歧之瑞修心會軒
宇宙山亭民立祠祀之

明一統志

王彥弼蠡之博野人為南康路總管督諸縣定民產高
下徵役視農事急緩流亡者悉復業焉三歲再蝗冒
暑帥民吏驅瘞不能為災燬石修朱子所造江岸石
閘以禦風濤商旅泊舟得安改江州路總管除前官

屬政暇日詣郡庠及濂溪景星兩書院勉勵士學咨
詢民瘼郡庠日就摧壓出學廩之粟各二百斛畀四
士分任其責一瓦一木不以煩有司自禮殿從祀講
堂門廡煥然一新郡城北瀕大江城壞無敢完補公
慨然興築其夏水大至郡民皆曰公實生我蜀人范
大性數十年寄隱造其廬命子事之以師禮錫其所
著易輯畧以傳江州任滿還蠡不復仕

吳澄撰墓碑

徐君寶至元中為建昌州判時夏苦雨民艱食立券假

官吏俸與穀百餘石以賑之至秋民輸穀以納復捐
俸為義倉寮屬與州人慕義者悉出穀以助得五百
餘石立士人掌之水旱有備民無凶荒之虞

豫章書

蔡瑛字子華至正初令星子為政廉明商人子李冬兒
為人誘去其父誣保安千戶都爾蘇謀殺獄具未決
瑛至訪之得冬兒不死實密使人致之寃獄遂釋

林

志

孫天民字可達濟南人至正間南康路總管平心治人

有清節多善政建譙樓修學宮凡學田見侵者悉復之

豫章書

明

王禕字子充義烏人太祖征江西禕獻頌喜曰江南有二儒卿與宋濂耳尋掌起居注已命同知南康府事賜金帶寵之居官有惠政太祖即位召還議禮洪武五年命禕齋詔諭雲南遇害詔贈翰林學士謚忠文

白志

呂明當塗人甲辰年知南康府時兵戈初息流民四散
官民解宇鞠為茂草乃即僧寺創草舍署事招撫流
移躬行田野以督耕桑不事刑威惟訓以義諭以法
民皆感化無敢梗者

明一統志

朱敏字悅道義烏人洪武五年以監察御史改知星子
縣興學勸農奏減稅糧茶貢以遷去民常思之

林志

卞同姑蘇人洪武間知都昌縣撫牧有方政聲丕著擢

河南知府

明一統志

李守中湖州人洪武中知南康府廉潔自持薪水之外

一毫不取於民

同上

林士敏莆田人洪武中由郎中知南康府文學政事皆

擅名於時歷任既久民猶愛戴之

林志

胡龍福建人洪武間任星子縣廉勤公正蔬食布衣除

革吏弊民深服之擢監察御史

同上

唐冕順慶人永樂初知星子縣剛介廉明案無留牘時

田廣民稀奏召鄰邑無田者八百餘家占籍佃種田

免荒蕪民生日庶

明一統志

楊鐸永樂間知星子縣撫字有方他郡民來歸者四百

餘家

同上

劉麒閩縣人宣德初由御史出知南康府作新士類勸

課農桑政治聿興士民戴之

林志

翟溥福字本德東莞人永樂進士知新淦縣遷刑部郎

正統元年七月詔舉廷臣堪為郡守者擢南康知府

先是歲歉民有擅發富家粟及收取漂流官木者前

守悉坐以盜當死者百餘人溥福閱實杖而遣之地
濱鄱陽湖舟遇風濤無所泊為築石堤百餘丈往來
者便之廬山白鹿洞書院廢溥福倡衆興復延師訓
其子弟朔望躬詣講授考績赴部以年老乞歸侍郎
趙新嘗撫江西大聲曰翟君此邦第一賢也胡可聽
其去懇請累日乃許之辭郡之日父老爭驢金帛悉
不受衆挽舟涕泣因建祠湖堤祀之又配享白鹿書

院之三賢祠

白志

按明一統志作翟溥

陳敏政錢塘人景泰中由通判擢知南康府秉公持正
翊善鋤強復社倉修石堤建白鹿書院百廢具舉民
不告勞郡人思之從祀三賢祠

林志

按明一統志作陳敏

孔鏞字韶文長洲人景泰進士為都昌知縣戶分九等
以定役設倉水次便收斂民甚賴之

白志

何濬河南人成化初由舉人知南康府時值大旱移檄

鄰郡貸米萬斛以給饑民全活者衆興學勸農政教

兼舉

林志

許顥字孟敬安陽人成化間以太僕寺丞出知南康府政令嚴明開河道以通商旅實義倉以備荒歉修葺文廟禱雨輒應士民懷之

同上

吳紳歙縣人成化間由舉人知都昌縣宅心平恕為政有方興利革弊民皆向慕歷官至都轉運使

同上

曹凱字宗元益都人成化進士由參政左遷衛經歷尋

擢南康知府豈弟慈祥廉明剛果剖決如流囹圄空
虛積粟備荒招集流散編戶日增政治為之一新

同上

上

劉定昌綦江人弘治進士知南康府知大體謹細行興
學校建書院有古循良風卒於官百姓哀之

同上

按明一統志作劉定安志作正德間任

劉幸慶州人正德間知南康府為政公勤操持清慎建

府治不費公帑民爭先趨之卒於官

同上

按明一統志作劉章

林寬莆田人正德間為南康通判當宸濠兵燹之後招四邑人民歸耕及勦九姓漁戶都御史王守仁唐龍交薦其才

安志

張愈嚴眉州人正德進士知南康府當兵燹之後節財愛士安輯流亡均平里甲賑恤貧民入覲卒於途歸櫬南康老穉為之巷哭

同上

陳嘉言薊州人嘉靖間星子典史流賊劫掠商舶嘉言

督義男與邑民宗允春等二十四人追至四山流賊
縱擊救援不至遂被害義男及允春等俱溺死

同上

吳寶秀字汝珍浙江平陽人萬歷進士授大理評事二
十六年出知南康府湖口稅監李道橫甚寶秀不與
通會漕舟南還乘北風揚帆直入湖口道欲奪其貨
遣卒急追之舟覆有死者道即遣爪牙吏持牒捕漕
卒寶秀拒不發道大怒飛章劾寶秀及星子知縣吳
一元青山巡檢程資阻撓稅務詔俱逮治寶秀妻陳

氏慟哭請偕行寶秀不可乃括餘貲及簪環得銀三兩許付寶秀曰夫子行以為路費夜自經死寶秀至京下詔獄星子民陳英者方廬墓儒士熊應鳳等走京師伏闕訟冤乞以身代大學士趙志臯疏救皇太后亦聞陳氏之死從容為帝言因與一元等並釋為民歸家踰年卒初南康士民建祠祀陳氏後改建合寶秀祀之天啟中贈太僕少卿

白志

李應昇字仲達江陰人萬歷進士授南康推官出無辜

十九人於死寔大猾數人重辟民服其公廉為之謠
曰前林後李清和無比林謂晉江林學曾以清慎著
稱者也九江南康間有柯陳二大族相傳陳友諒苗
裔負固強梗嘗拒捕有司議勦應昇單騎往諭皆叩
頭請命出所匿罪人一方以定擢御史以忤璫削籍
詔獄掠斃年甫三十四崇禎初贈太僕卿謚忠毅

同

上

按東林列傳應昇在南康律已清嚴公庭如水興

復白鹿洞書院立館舍招集人士旬有小會月有
大會會期親詣洞宿與諸生質疑問難推明紫陽
之教一時從遊學者千里應之其成名於世者指
不勝屈

原跋

費兆元號臺簡烏程人進士萬歷間守南康居官清正
氣宇春容助婚瘞發倉廩摘伏如神增閭閻減稅遷學
宮建寶塔飭新鹿洞美政口碑載道累官刑部侍郎

安志

袁懋貞泰州人萬歷舉人知南康府勾剔蠹隱飭兵清賦建隄築閘修白鹿洞禮迎主教興起士行陞任去

同上

邱度字志中山陽人萬歷進士授南康司理勢宦僕殺人私占民田諸問官首鼠度歸民田而抵之法監九江鈔關諸瑣屑及乘風宵渡者俱不問而額亦不乏擢守汝寧清慎推天下第一歷官戶部侍郎卒祀鄉

賢

江南通志

羅尚忠字心華青陽人萬歷進士補建昌令政平訟理
辛酉入闈章世純朱健朱徽皆出其門最號得人歷

官太常少卿

安志

楊三省號紫凝太平人以選貢入北雍試第一授江西
安義令居常沉默寡言遇事剛斷劉總戎僕殺人當
道置不問省鞫得其狀立置之法值歲侵煮粥療饑
告糴散種寬積逋籍糧額政聲大著陞茂州知州番
民悅服以剛直忤上官遷潞藩左傳遂引疾歸

浙江

通志

汪宗文蘄州人舉人天啟間知南康宣弟清栗修城築隄施藥救民捐俸貸餉地方賴之

安志

何起龍成都人天啟初南康同知署建昌有幹才鄱湖有大木兩角伏水中舟過為患起龍命習水者曳其木上以為龍王像置宮亭湖廟祀焉自後舟行無恙人德之

同上

張士亨淑浦人崇禎間知安義縣有才能時鄴邑李肅

七肅十為寇士亨奉檄勸撫民賴以安有平寇錄

同

上

吳賜玉字輯五歙縣人為南康通判戈陳賊寇南康賜玉手捉鐵鞭率壯丁往勦時賊已去城三十里據岡為陣賜玉追及發一矢中賊冠賊拔嗅之曰未傳毒乃下岡反擊賜玉躍馬獨前持鞭格殺數賊卒遇害

贈按察司僉事

白志

國朝

聶應井四川宜賓人由舉人順治二年知南康府守城禦寇地方賴之後隱於廬山子孫遂家焉

安志

溫可掬直隸人順治四年南康通判金聲桓之亂死之

同上

俞之琛福建人建昌縣丞順治戊子武寧寇率衆圍城三日城陷官民逃竄殆盡之琛朝服端坐須臾賊至擁之歸營誘降之琛握拳透爪罵賊凡三晝夜遇害

福建通志

李長春字卉圃遼東人順治初知南康府兵燹後加意綏懷賑饑乞糴費不言惠獄訟無冤興復鹿洞書院擢憲臬歷楚藩內陞便道入洞與諸生講學信宿而

去

安志

周燦字星公臨潼人順治進士守南康地臨湖多水患設救生船以拯溺講學白鹿書院造士多所成就陞

四川督學

陝西通志

九江府

吳

徐盛字文嚮琅邪莒人以勇氣聞以別部司馬統兵五百人守柴桑長拒黃祖祖子射常率數千人下攻盛盛時吏士不滿二百與相拒擊傷射吏士千餘人已乃開門出戰大破之射遂絕跡不復為寇

吳書

陸抗字幼節孫策外孫也年二十拜建武校尉與諸葛恪換屯柴桑抗臨去皆繕完城圍葺其牆屋居廬桑果不妄取恪入屯儼然若新而恪柴桑故屯頗有毀

壞深以為慙建興元年拜奮威將軍太平二年魏將諸葛誕舉壽春降拜抗為柴桑督赴壽春破魏牙門將遷征北將軍孫皓即位加鎮軍大將軍

同上

按徐盛陸抗林志俱不載但後漢書郡國志立柴桑縣於豫章郡太平寰宇記云赤烏本柴桑舊域吳書徐盛傳守柴桑長陸抗傳云為柴桑督是宜入九江者因采錄之至若兩漢書所載九江太守有王嘉宋均服虔盧植邊讓諸人考漢之九江所

統十四城與今之江西無涉故不敢混載又按九江府志及林志載晉華軼應詹溫嶠劉肩庾亮褚裒庾翼王羲之王允之謝尚桓冲桓伊何無忌劉敬宣孟懷玉庾悅凡十有六人宋王弘檀道濟齊陳顯達梁蕭秀等俱已采入統轄名宦皆以江州刺史都督數州軍事者所轄甚廣不得以九江一郡當之也又晉書孟嘉傳只有辟廬陵從事之文應入吉安乃安志府志又以為州別駕闌入今依

本傳止載吉安

原跋

南齊

庾弘遠字士操清實有士譽為江州長史時刺史陳顯
達舉兵敗斬於朱雀航將刑索帽著之曰子路結纓
吾不可以不冠而死謂看者曰吾非賊乃是義兵為
諸君請命耳陳公太輕事若用吾言天下將免塗炭
弘遠子曜年十四抱持父乞代命遂併殺之

南齊書

唐

鄭善果鄭州滎澤人貞觀初為江州刺史善果母崔賢
明曉政治嘗坐閤內聽善果處決或當理則悅有不
可則引至牀下責媿之故善果所至有績號清吏云

唐書

李光字茂初趙州人李勉觀察江西表光署判官永泰
初劇賊方清陳莊西絕江路劫商旅為亂支黨盤結
光請以秋浦置州勉是其計奏以宣之秋浦青陽饒
之至德置池州即詔光攝行州事後魏少游代勉表

署都團練副使攝江州刺史

同上

韋應物京兆長安人建中三年出為滁州刺史久之調江州追赴闕改左司郎中復出為蘇州刺史應物性高潔所在焚香掃地而坐惟顧況劉長卿丘丹秦系皎然之儔得廁賓客與之酬唱其詩閒澹簡遠人比之陶潛稱陶韋云

全唐詩小傳

韋辭字踐之以兩經擢第累官侍御史以事累出為朗州刺史再貶江州司馬長慶初韋處厚路隨以辭望

居顯要有文學理行亟稱薦之歷潭州刺史湖南觀

察使

九江府志

白居易字樂天其先太原人徙下邳敏悟工文章未冠
謁顧況況曰吾謂斯文遂絕今復得子矣貞元中擢
進士補校書郎元和元年召入翰林為學士遷左拾
遺四年旱居易建言乞蠲免江淮賦以救流瘠且多
出宮人憲宗頗采納累官拜左贊善大夫是時盜殺
武元衡居易首上疏請急捕賊刷朝廷恥宰相嫌其

出位不悅貶江州司馬既失志能順適所遇託浮屠
生死說若忘形骸者久之徙忠州刺史歷官太子少
傅會昌初以刑部尚書致仕卒贈尚書右僕射江州
人為立祠

唐書

王鏐字昆吾太原人嗣曹王臯為團練使俾鏐誘降武
岡叛將王國良以功擢邵州刺史臯之節度江西也
李希烈南侵臯與鏐兵三千使屯潯陽而臯全軍臨
九江襲蘄州遂以衆濟表鏐江州刺史鏐小心善刺

軍中情事無小大臯悉知之因推以腹心累官同中

書門下平章事卒贈太尉

同上

錢徽字蔚章吳郡人起子貞元初進士長慶元年為禮部侍郎忤宰相段文昌貶江州刺史初州有盜劫貢船捕吏求盜不得乃取江濱惡少年二百人繫訊徽按其枉悉縱去數日得真盜州有牛田錢百萬刺史以給宴飲贈餉者徽曰此農耕之備可他用哉命代貧民租入歷官吏部尚書致仕卒贈尚書右僕射

同

李渤字濬之魏橫野將軍申國公李發後元和九年以
著作郎出為虔州刺史奏還信州移稅錢二百萬免
賦米二萬石廢冗役千六百人觀察使上狀不閱歲
遷江州刺史度支使張平叔斂天下逋租渤上言度
支所收貞元二年流戶賦錢四百四十萬臣州治田
二千頃今旱死者千九百頃若徇度支所斂臣上不
能奉詔下不忍民窮無所逃死請放歸田里有詔蠲

責勑又治湖水築堤七百步使人不病涉入為職方
郎中進諫議大夫太和中召拜太子賓客卒贈禮部

尚書

同上

劉秉仁乾符間為江州刺史賊李彥章者掠江西秉仁
乘驛之官單舸入其水寨賊出迎請降秉仁執其渠
魁斬之散遣其衆百姓安堵

彥章書

塗曉僖宗時以中散大夫為江州刺史以廉能稱當時
士林重其才品號為金聲玉色

同上

南唐

廖凝字熙績衡山人少隱居南嶽江南賊起凝曰與其
抱道以死孰與就義以存吾宗遂出為彭澤令慕陶
處士為人已而笑曰淵明不以五斗折腰吾寧久為
人役即解印歸衡山

十國春秋

周宗字君太廣陵人常給使烈祖左右及烈祖鎮金陵
宗為都押衙既贊禪代累遷樞密使初俞文正為烈
祖幕賓而宗及馬仁裕皆從給使至是宗出鎮江州

文正猶為九江巡官輒問宗曰馬押衙何在宗笑曰
馬相公出鎮浙西久矣文正嘗與公宴俛首詐曰下
官飲量褊局令公素知之座皆愕然而宗不之罪其
寬厚類如此

馬令南唐書

皇甫暉魏州人歷歙州刺史神衛軍都虞侯江州節度
使周師攻淮南為北面行營應援使會劉彥貞姚鳳
兵以行彥貞舉動躁撓人測其必敗暉獨持重部分
其整士亦樂為用周人頗憚之及彥貞敗死暉鳳退

保清流關世宗分兵襲清流暉敗斷橋自守周兵涉
水踰城入執送壽州行在世宗賜之馬及衣帶數日
創甚暉不肯治而卒

陸游南唐書

胡則後主末為江州指揮使金陵陷曹彬以後主手書
喻郡縣悉以城降書至江州刺史謝彥實集將佐視
之謀納款則憤形於色亟出謂其下曰吾屬世受李
氏恩安可負之且此書真偽不可知刺史不忠欲污
吾州爾輩能從我死忠義乎衆皆曰善乃帥同列宋

得明等大譁入攻彥賓執而殺之衆推則為刺史號
令肅然堅壁死守太祖命曹翰攻之堅不可破翰軍
死傷者衆會則疾草不能起城始陷翰執則將礮之
而則已死腰斬其屍

同上

吳舉字大冲永興人後主時為彭澤簿曹彬兵破池陽
遣使降郡縣使至彭澤令長欲以城降舉以大義責
之且曰吾能為李氏死乃殺使者固守不下及煜既
降舉為遊兵所執送大將軍義而釋之

林志

宋

鍾離瑾字公瑜合肥人開寶間德化令守義愛民有女將嫁許氏得一媵女於臨川一日瑾視事歸見女流涕有戚容詰之曰吾父曾令是邑不幸與母俱亡今十年矣適見明府視事追感吾父不覺淚下瑾大驚遂易其衣服養為己女時許氏納采有日瑾以書告緩其期曰吾買媵而得前令之女將輟吾女奩資先嫁之許氏亦惻然報書曰君侯能抑己女而拔人之

孤女盛德事也吾有季子願以為婦卒與俱歸久之
瑾夢綠衣丈夫造謝曰不圖賤息辱賜於君今得請
於帝奉公十任官祿後果歷十郡太守終江淮發運

使

林志

周速太平興國二年為江州刺史施政安民崇尚儒道
時白鹿洞學徒數百速上疏乞賜九經令肄習之詔
俾國子監給印本驛送至洞

府志

羅彥輔字經世當塗人嘉祐進士調南城尉以捕盜功

移江州令南城人有感其德者篋金追送於路彥輔固謝不受用薦改著作佐郎知湖口縣僚吏有誣彥輔者時劉述為郡守曰羅湖口廉吏也按得其情反坐之遷少府監簿復與長官論不合謫江州酒稅或令求直荅曰九江去家近奉親便復何求哉後判和州暨池州尤多政績

同上

趙士隆字景瞻太宗之後為郡縣吏累遷至淮南西路兵馬鈐轄駐壽春劇賊丁一箭衆號十萬來攻城擊

走之以功授江東路鈐轄李成叛遣其黨馬進圍九江九江守臣姚舜明與士隆及副鈐轄劉紹先禦之時守城罷卒僅數千捍賊百餘日城中食盡舜明紹先議縱火因棄城去士隆獨毅然糾合部曲餘民守城城破衆號呼曰無殺我趙鈐轄賊入城大掠成素服士隆之義欲以為偽安撫使士隆怒罵曰賊欲屈我耶陰裂帛以書使示諸子曰賊不殺我義不苟活汝輩得出為我雪恥遂仰藥而卒賊怒并害其宗數

十口事聞上嘉悼贈武功大夫官其孫二人

宋史

趙士道以武翼大夫守官江州紹興五年馬進寇江州

士道遇害贈武德大夫官其家二人

同上

葉義問字審言壽昌人舉進士通判江州時豫章守張
宗元忤秦檜檜下漕臣張常先勘焉宗元道九江常
先檟義問拘其身義問投檟曰吾寧得罪不為不祥

明一統志

韓彥直字子溫世忠子六歲從世忠入見高宗命作大

字即拜命跪書皇帝萬歲四字帝喜撫其背曰他日
令器也登進士第秦檜素銜世忠不附和議出彥直
浙東安撫司主管檜死進直龍圖閣江西轉運兼權
知江州時朝廷還岳飛家貲產多在九江歲久業數
易主吏緣為奸彥直搜剔隱匿盡還岳氏復為司農
少卿總領湖北京西軍馬歷官至顯謨閣學士
劉頴字公實江西運使判江州時德化縣民逃徙大半
田盡荒守臣乞蠲稅不報頴以見種之稅均於荒萊

民願耕者遞減之於是逃民盡復

明一統志

余崇龜字景望興國州人開禧中守江州新學校築城隍躬行阡陌與百姓同勞苦政聲著聞官至兵部侍

郎

同上

魏了翁字華父蒲江人慶元進士理宗時官端明殿學士同簽書樞密院事督視京湖軍馬會江淮督府曾從龍卒并以江淮付了翁又賜便宜詔書如張浚故事詔宰臣飲餞於關外酌上下流之中開幕府江州

申儆將帥調遣援師奏邊防十事甫二旬召為簽書樞密院事時以疾力辭改資政殿學士劍南安撫使

宋史

趙昂發字漢卿昌元人登進士第為彭澤令政尚寬平以忠孝節義勵俗其奸暴為民患者痛懲之邑人高竹簡精性理之學昂發數與討論後擢池州通判元兵陷城不屈死追贈忠毅侯

府志

元

曹靖國大德間為彭澤令為政簡而廉修譙樓新縣廨
平官道飭水驛建萬里江天亭復淵明祠葺城隍士
民感之為立惠愛亭

明一統志

馮克敏臨清人延祐間為彭澤簿修廢墜景賢拮嘗刊

狄梁公靖節碑及鑄小孤山鐵柱

林志

王國輔魯人至元間彭澤尹初至值水旱相仍民以歉
告國輔憂民不數日髭鬚皤然抗疏乞免民租詔許

之

同上

李黼字子威潁人也泰定四年以明經冠多士授翰林
修撰至正間授黼江州路總管十一年夏五月盜起
銳意南攻九江居下流實江東西襟喉之地黼治城
濠修器械募丁壯分守要害且上攻守之策於江西
行省請兵屯江北以抗賊衝不報黼歎曰吾不知死
所矣十二年正月己未賊渡江陷武昌威順王及省
臣相繼遁舳艫蔽江而下江西大震賊乘勝破瑞昌
右丞博羅特穆爾聞之遁黃梅主簿伊遜特穆爾願

出擊賊黼大喜向天瀝酒與之誓言始脫口賊游兵
已至境倉卒無號乃墨士卒面統之出戰黼身先士
卒大呼陷陣伊遜特穆爾繼進賊大敗逐北六十里
殺獲二萬餘黼謂左右曰賊不利於陸必由水道以
舟薄我苟失備禦吾屬無噍類矣乃以長木數千冒
鐵推於杪暗植沿岸水中逆刺賊舟謂之七星椿會
西南風急賊舟數千果揚帆順流鼓譟而至舟遇椿
不得動進退無措黼帥將士奮擊發火翎箭射之焚

溺死者無算行省上黼功請拜江西行省參政行江
州南康等路軍民都總管已而賊勢更熾黼守孤城
提孱旅斬馘扶傷無日不戰中外援絕賊至甘棠湖
焚西門乃張弩箭射之賊轉攻東門黼救東門賊已
入與之巷戰力不敵與從子秉昭俱罵賊而死郡民
聞之哭聲震天黼死踰月參政之命始下事聞贈隴
西郡公謚曰忠文詔立廟江州贈額曰崇烈

元史

陳元愷字時舉鳳翔人至正間守江州尊學校以表章

儒先復狄梁公廟崇周濂溪墓葺魏了翁廬人稱損
齋先生士多宗之

林志

黃德隆山東人為江州萬戶管軍尚節概元末城陷與
總管李黼同死於兵因世居高良山之麓

府志

明

黃安泰蘄州人洪武元年知彭澤縣會兵燹後間關跋
涉身勞民事惟以廉勤為政百廢具舉

林志

傅道字士行錢塘人洪武中任德化縣丞清介自持攜

二童隨任偽漢初平民心皇皇田野不治道盡心民
事以勤卒官葬城東欽天山麓

同上

鄭思賢東安人洪武間令德安以廉仁稱秩滿邑民詣
闕上疏留之復任九載政治如初卒於官葬縣山之

麓

府志

孔復字士亨博興人永樂初以御史出知九江府宅心
仁厚廉公有威剛明兼濟案牘清而吏弊除田土闢
而民生遂至今民猶頌之

明一統志

王銘建安人永樂中舉孝廉知德安豈弟樂易時邑有虎患銘禱於城隍一夕雷擊於縣西之箬山隴聿新

文廟士民均感

同上

潘貴侯官人永樂中任德安典史邑不習紡績夏稅學布困於歲輸貴請於朝改輸綿至今便之

府志

求琰字信圭浙新昌人宣德中授九江通判莅政務崇寬厚禁民淫祀時勅建天池寺督役者擾民民訴於琰琰遂躬督之人喜赴工歲歉勸富民出粟賑濟民

賴全活

林志

馬驄字馴良臨桂人正統間知德化縣廉慎不私以學
校農桑為務嘗修甘棠堤作煙水亭及新瀟溪祠後
陞工部主事未任卒於官葬廬山之麓

同上

鄧周字文郁連州人正統間為彭澤令邑多虎患周曰
其咎在令乃禱之城隍虎引去又多火災乃教民以
陶易茅火遂息

府志

劉仁宅華容人由鄉舉知瑞昌縣流民千餘家匿山中

邏者索賂不得誣民反衆議加兵仁宅單騎招之民
爭出訴遂罷兵擢廣西副使

白志

按林志載仁宅下車首陳三疏蠲赤湖虛課二萬
緡免舊欠蘆柴十餘萬完逋稅數千石

謝昶黃岡人正統進士天順三年知九江府莅政公勤
撫民惠愛以憂去民不忍舍官至右副都御史

明一

統志

安永邯鄲人天順中九江府同知廉慎勤勞不事刑威

而人自服修甘棠堤以防亢旱構思賢橋以便往來

六載卒於官民感慕之

同上

董紱麻城人天順末任湖口令清慎惠民邑有蘇觀渡

水蓄堤壞紱重築之民被其澤

府志

常元山陽人成化初知彭澤縣常建議移龍城驛於小

孤山遷峯山巡檢司於燕支港減編馬船割鄱陽地

四事為人所稱

明一統志

童潮慈谿人成化間任九江知府莅政公勤撫民仁恕

善文章尤勤於修葺卒於官有遺愛焉

同上

按九江郡故無志潮始葺修

周津字文濟慈谿人弘治中知九江府有理劇才均徭役簡詞訟通鹽法盡革買補軍伍之弊尋改調瑞州

府志

王春嘉定人弘治中由舉人知德安縣廉能謹恪百廢具舉而不傷民財尤嚴捕盜境內肅然去之日攀轅

者塞道

林志

黃源閩縣人由舉人正德間知瑞昌縣端謹沉毅有節

介不為事物屈撓興利祛弊政績丕著

明一統志

蔡元偉晉江人由舉人嘉靖五年知德安縣慨邑衝疲

申革潯陽支應力請協濟民蘇疲困拜火反風禱雨

輒應遷杭州通判又遷撫州同知

府志

藍淦字可虛閩縣人由舉人嘉靖間令湖口素性清苦

以課士勸農為務嘗夜半微行見二婦績久而饑計

家中無可為食獨有酒一罍兩婦存其清者飲客而

以濁自飲至底無濁置酒歎曰是酒一清徹底有如
藍君矣翌日召兩婦勞之曰績至夜分勤也飲濁存
清禮也無濁而終不飲儉也以婦人而知賢其上義
也厚賜之巡按御史至立清廉貪酷四表令屬吏自
揣其行立何位次衆莫敢措步淫攝衣直趨廉字下
御史曰藍令之賢尚未止此當更進一步即以嶺北
一人薦之以陞去民遮道攀轅作去思亭

安志

程鳳金黃岡人嘉靖己酉鄉舉知彭澤縣所行善政俱

協人心士民生祠之有禱輒應益以為神居官方正
不阿直指按部上謁稍後直指諷之曰相度當如是
耶鳳金出曰御史所以有權者能去人之官也吾官
自去御史何權為詩懸縣門云一生惟拙天知我三
載無能我媿官今日銓衡方論定好歸舊隱理漁竿
遂挂冠歸直指旋悔遣牙官追之竟不返

湖廣通志

沈詔號龍洲仁和人嘉靖間令湖口銳意任事百廢具
興邑故無城詔目擊調兵之擾條陳八議當事咸是

之逾年城工成他若葺小學復射圃纂邑志修補文

廟祭器政績偉然

安志

朱公節字允中山陰人嘉靖舉人授彭澤令時海寇竊發日閱士增修城守寇不敢窺先是屯軍雜居境內蔑視令有爭訐輒走上官公節令每屯若干出操軍一丁班分之束以伍法給餉屯於小孤分直縣四門守衛同民兵訓練是後就縣官約束軍民一體矣嘗題署云公餘閉閣嘗思過夜靜焚香獨告天五年擢

泰州知州

府志

高裕溧陽人由舉人嘉靖末知彭澤邑戶多虛糧賦役偏累裕丈均之作清田紀錄網列條晰賦不擾民

彭

澤志

殷乾吳縣人由舉人嘉靖間令德安清介自持奉檄修城動支夙羨一千有奇皆百姓積負乾卽照數分定牆圍丈尺責令修畢民甚稱便民饑多方賑貸全活甚衆

安志

鍾卿東莞人嘉靖進士知九江府七年多善政以清操自持鵬月解任猶衣葛初擬築南門新壩苦費無所出後歷任山西布政使齎千金為九江築之

府志

俞汝為華亭人隆慶進士任德化縣邑三洲濱江歲苦水泛汝為築堤數千丈以絕產變價為之不煩公私人享其利又改里甲為條鞭分限納銀人便之

同上

李得陽字伯英廣德人進士隆慶間知九江府築三洲堤建澄江樓崔符警息歷陞湖廣巡撫

江南通志

葉朝榮字良時福清人隆慶恩貢授九江通判主督賦
潔已恤民逋賦畢登佐摧闕秋毫不緇免商緡無算
臺使者賢之數令攝邑瑞昌有漢河患鑿河以固城
修彭澤城為江省障二邑人尸祝至今擢任去

福建

通志

施本德休寧人萬歷初由掾尉德安緝捕甚嚴奸宄屏
跡聽訟悉情以清節著丁內艱士民遮道送之

安志

趙一韓字淡雲巢縣人萬歷甲辰進士任九江司李除

奸蠹抑豪強明敏風厲時昭璫權商恣橫一韓裁抑
之械其爪牙十數輩置之法仕至貴州憲副

江南通

志

胡天祿祁門人萬厯初德安主簿為治精敏革催徵部
運常例均夫馬迎送勞逸善折疑獄丈軍民田修橋
路營館舍以勞蹟著

安志

孫同倫字汝明靖江人萬厯辛卯舉人知德化縣蠲例
金蘇驛困築封郭桑落二洲石堤百餘里更置石閘

以洩瀦水民永賴之

江南通志

劉鍾烏程人由歲貢萬歷四年知德安縣作問政堂思

艱亭修築北湖堤民甚便之

府志

邵重祿字孟廉夔州人萬歷間權舟九江盡委府佐於

他所主守推金暮則貯之郡庫雖巨萬未嘗一寓目

汰各役之冗關市肅清其妻亦甘貧紡績不倦時以

為難

安志

宋子恭榮經人萬歷間以歲貢知彭澤縣盡蠲無藝之

征罷非時之役邑有飲人以藥而攫之金者覆其事
十餘年四鄰無能知一日子恭過其門鸛鵒自樓而
下投袖中子恭異之曰此必有冤訊之果得其狀置
之法邑人以為神以左遷去士民惜之

同上

謝廷訓晉江人萬厯間令德化強毅有守不以顏色假
人戊子己丑洊饑躬詣潯關坐以待米舫之下水者
量其多寡而平糴焉時長洲相方柄國吳商以為名
廷訓并留之曰吾為百姓寧恤一官竟以是獲罪去

之日父老皆哭送之

府志

吳秀吳江人隆慶進士萬歷間知九江府多所興建開南薰門建甘棠湖閘開便商河掘老鸛塘新能仁寺

塔士民頌之

安志

張紀號浣瀾四川人由舉人萬歷戊戌令湖口廉明豈弟不趨權勢內監李道樞湖關商旅苦之紀條病商十四事密上兩臺疏請後罷李道撤湖關皆紀首事也

同上

廖汝恒號密齋恒州人由舉人萬歷間為湖口令奉例丈量戴星履畝一秉於公民便之於下鐘山建立講堂顏曰大觀閣延豐城李見羅主講士皆雲從之

同

上

邢有忤昌邑人萬歷進士知九江府操持峻潔民執市中布為所失盜賊訟而繫之獄株連多死者有忤驗布廣狹不類盡出之人服其明

府志

白紹光號鏡臺武進人舉人任彭澤令居官清潔愛民

禮士歲旱暴日中哀禱大雨如注槁苗復蘇擢吏科

同上

蕭上達沔陽人由舉人天啟間任德化縣清慎慈和民
愛樂之時奉檄建魏瑞生祠又檄撤各書院上達獨
持不報好文下士視一切世味泊如也

同上

李日華嘉興人天啟間任九江府推官嗜古博洽飛翰
如流視篆瑞昌仁而愛民邑苦支應馬價條悉具請
得減民甚感之有六研堂文集行世

瑞昌志

李正春號瑤液太倉人崇禎間任德化縣耿介剛方歲饑正春巡關遇米艘下即糴之徧設粥廠民賴以活在任七年惟一吳供使而已

府志

趙三薦全州人舉鄉試第一崇禎間令瑞昌嚴殺有才智善捕盜驗盜真實必殺無貸以不禮漕院承差失官地方紳士請復任以備流賊陞肇慶同知卒殉難

同上

余士瑋字季美黃岡人崇禎丁丑會魁風矩端嚴尺寸

不苟又極淡泊平易授九江推官首禁爭鬪者不許
詈罵父母左兵叛抗義不屈斷其左臂九江父老泣
扶之出城越十日卒於廬山

湖廣通志

按九江府志作余士常號巨平麻城人誤

彭永春武陵人崇禎十五年任九江衛經歷乙酉左逆
東下春曰春雖微職受國恩不敢從賊具冠帶命一
僕舉火焚署且大書於屏曰九江衛參軍彭永春死
節處合家男女六口俱焚死

同上

成啟字伯佑應天人以貢任湖口縣主簿乙酉四月左
兵圍城啟具公服端坐於庭俄而賊兵奄至啟叱曰
國家養爾將以靖亂何反為亂賊猝之下復索金叱
曰寒官也何金可索賊舉刃殺之

白志

張懋謙字顧存錢塘人由舉人崇禎間知九江府勵精
圖治時流賊張獻忠陷蘄黃蹂躪梅廣分掠九江界
懋謙多方防禦民得安堵無何饑饉洊臻崇禎作厲
懋謙發粟賑救施藥療病築堤修閘治皆可紀

九江

續志

國朝

席教事號覺海臨汾人明癸未進士順治六年任九江
推官賦性耿介時有民某妻殺婢而匿其尸反誣婢
母家審莫得其狀教事夜半默禱夢披髮婦泣訴覺
而異之次晨復覈得情委官抵其家於菜園內啟屍
依律坐罪合郡頌神君焉行取刑部主事

安志

牛森獻縣人順治三年任德安縣清介慈和邑處衝疲

值歲凶森多方軫恤安集殘黎踏荒蕪寬稅斂後因
軍餉緊急躬催致疾暴卒於通遠驛百姓哀之

同上

董襄號淡園湯陰人順治丁亥進士任彭澤縣居官廉
潔免火耗除積盜建學課士皆善政可紀者

同上

崔掄奇字正誼夏邑人以進士官兵部郎中順治間權
闕九江為人高邁雅好文章日課士拔其尤時郡火
災掄奇捐金每戶賑米一石錢稱是瀛溪書院圮立
新之復煙水亭構樓以祀古賢為之記

同上

張侯字貞一深州人康熙五年任德安令邑舊多逋賦
侯至洞悉其弊始復遞年里役免其催徵無賠累諸
苦更建學宮置營舍橋梁祠宇罔不聿新百姓稱之

同上

江臯號磊齋桐城人順治辛丑進士令瑞昌甫下車即
期為地方作不朽事瑞故水繞城下後改決他去民
且病汲里居不蕃臯上請築堤濬壅使水復故道城
南一帶煙火數百家衣冠之族亦輩興焉又於漁師

渡頭復建高閣下障水口以補東南之闕民甚賴之
事具修河紀績陞本郡同知歷四川提學興泉副使

九江續志

江殷道字九同漢陽人順治戊戌進士康熙九年任九
江知府甫下車值歲荒捐俸設粥廠不給乃袖蕨根
糠粃謁上臺哭請以存留公帑二萬二千餘緡七千
四百餘石發賑存活甚衆詳請南九衛屯銀四千一
百餘兩修學宮以敦根本督課業以育人才葉李堤

建陶白祠修郡乘培城堞百廢具舉

同上

朱儼號恒齋大興人以父之弼蔭由郎中出守九江到任即革諸陋規一切苞苴杜絕念黌宮為首善地捐俸修理重葺濂溪書院改創公署甲戌年盜案誑誤合郡士民叩闕保留復官值歲饑請米賑濟民多賴之儼清廉慈惠政識大體不屑屑問瓶壘即屢攝上篆而貧益甚在九江凡二十三年以老病罷及卒扶櫬無資士民哭而助之所著有恒齋集

同上

甯維邦字新周遼東撫順人康熙二十一年令德化廉潔強毅初赴任抵潛山界聞滇師北旋沿江擾甚即星夜兼程赴任適旗卒有射殺人者走匿舟中維邦廉得卒請置於法滇師聞風懼服自是秋毫無犯舊例征糧責成里長凡十年一輪幫貼無算奸猾乘機包充侵蝕詳請勒碑永禁民困始甦文廟義學捐囊修葺舊署湫隘不可居毅然鼎建之以病卒於官

同

上

楊大鯤號陶雲武進人順治己亥進士少負文名工詩賦書法由庶常左遷新建丞兩署縣篆不剛不柔遇事立決築楊子居於湖濱遂成名勝擢九江同知即陞知府時滇閩交煽江界多事惟務鎮靜省訟理冤投匭告訐之風頓息嚴以率屬勤以訓士邵農勸課築堤捐賑率多善政陞湖廣下江防道山東按察使

卒祀九江名宦

崇祀錄

金光房字天駟全椒人順治己亥進士授九江司理修

理澹臺先賢諸祠辨邏卒私鑄之誣建屋以安挿投
誠兵弁民不知擾裁缺歸惟圖書一篋

江南通志

吳士宏字喈士福建侯官人康熙壬子舉人知彭澤縣
請除羨耗嚴苞苴絕餽賂上官薦章有素履端方居
官廉慎之語尋請假歸

福建通志

江西通志卷六十四

欽定四庫全書

江西通志卷六十五

名宦

九

南安府

宋

李亨庚字坦之隴西人初為從事以勤著績漕運康侯表於朝擢南安軍丞至道中陞為守雪冤獄二百餘人毀淫祠四十餘所

林志

按宋淳化元年始置南安軍歐陽志輿地廣記云
南安軍自五代以前地理與虔州同凡南部都尉
南康郡國俱屬虔州故林志於南安名宦自宋李

夸庚始

原跋

祝深字通甫三衢人至道中知南安軍慈祥愷悌下教
立五條曰修學化俗曰飭吏愛民曰清訟省困曰節
用下士曰歲豐時和百姓宜之立祠於學

明一統志

嚴肅字成之大中祥符間由大理丞知南安軍通敏之

才正直之氣勸善懲惡民以無訟輦運無滯物產豐

盛

同上

周惇頤字茂叔道州人元名敦實避英宗舊諱改焉為
分寧主簿有獄久不決惇頤至一訊立辨邑人驚曰
老吏不如也部使者薦之調南安軍司理參軍有囚
法不當死轉運使王逵欲深治之衆莫敢爭惇頤獨
與之辨不聽乃委手板歸將棄官去曰殺人以媚人
吾不為也逵悟囚得免移郴之桂陽二年徙知南昌

南昌人皆曰是能辨分寧獄者吾屬得所訴矣厯合州判官部使者趙抃惑於譖口臨之甚威通判虔州抃方守虔熟視其所為大悟執其手曰吾幾失君矣今而後乃知周茂叔尋以疾求知南康軍因家廬山蓮花峯下前有溪合於湓江取舊所居瀟溪以名之抃再鎮蜀將奏用之未及而卒年五十七黃庭堅稱其人品甚高胸懷灑落如光風霽月著太極圖說并通書四十篇嘉定十三年賜謚曰元公

宋史

程珣字伯溫洛人寶元康定間通判南安軍事視周惇
頤氣貌非常人與語知其為學知道因與為友使二
子頤顥往受業焉敦頤每令尋孔顏樂處所樂何事

二程之學源流乎此

宋史周惇頤傳

陳升之名旭避裕陵諱以字行三衢人景祐甲辰進士
以校書郎知南康首建學校化民成俗熙寧中拜使
相邑人懷之為建坊

林志

劉安世字器之魏人登進士第不就選從學於司馬光

咨盡心行已之要光教之以誠且令自不妄語始光
入相薦為秘書省正字擢右正言進左諫議大夫尋
以集賢殿修撰提舉崇福宮才六月召為寶文閣待
制出知成德軍章惇用事尤忌惡之黜知南安軍蔡
京入相連七謫至峽州羈管卒年七十八

康史

程敏叔熙寧間以秘書丞出守南安軍始至訪問利病
興廢以時既獲豐年乃因餘財改作學宮

彭汝礪南

安學記

曹登紹聖間為南安太守以治郡顯聞所至必建學故

南安之學甲於江西

蘇軾南安學記

郭見義字季勇河南人紹興間南安軍學教授立周程

三先生祠於學撰記立石

府志

都潔字聖與京口人學邃於易有易說行於世紹興中

知南安軍勤身率下宣布德澤囹圄空虛年穀豐登

移守南雄士民猶相率候問戀慕不已

林志

李聞之開封人紹興中知南安軍寬嚴得中待士以禮

復城東廟學之舊補書籍之遺嘉惠來學郡人德之

立祠於學宮

府志

范振紹興中知南安軍上書論雇募者戶長十事高宗

稱其闢民利病言多可采

明一統志

黃謙字牧仲三山人乾道初以進士知大庾縣母老留

婦養於家謙乃單車之官為政勤明常攝南康父老

吏民相率遮道留之至為感泣

林志

黃由庚字道卿建寧人乾道中知南康時猾吏姦民表

裏黃緣由庚正其詭弊人不敢欺嘗置學田以贍士

既去民立祠祀之

府志

李大正字正之建安人淳熙中知南安軍適郡賦稅不

辦豪猾梗治大正理賦稅計利害務窮其源一郡肅

然每坐宴閣聽事終日忘倦暇則習射於後圃云

林志

管銳南陽人淳熙中知南安軍勤政愛民增修學舍士

民懷之立生祠學宮額曰頌禧堂

同上

方崧卿字季申莆田人淳熙間擢知南安軍事廉勤平

易嘗與教授許開修南安軍志

府志

趙孟適號菊山淳熙中知南安軍以廉勤為政以孝弟

教民其於學校尤加意焉

歐陽守道南安學記

王式字用之曲江人年十四舉進士授秘書省校書郎

歷南安司理清謹自守而發姦摘伏一郡咸以為神

府志

戴翼字汝諧三山人紹興中攝南康鼎砌城壁兩新縣

治政績著聞

林志

梁現番禺人寶祐間知南康捐俸增修祭器課訓諸生
舉行射禮士民懷之

同上

胡泓紹定間知上猶縣築城為民捍禦後令李申與籍
此以禦元兵

同上

李申與宋末知上猶縣忠愛廉謹深得民心歲丙子冬
元兵攻上猶城與率民死守及元參政賈復至諭降
乃與居民李梓發等誓曰邑未城前遇有變民輒散
而之吉贛胡泓徙邑築城正為吾民守義具也前人

建城後人降城於義勿許乃堅守至七十五日城屠
李梓發全家自殺申與死之有雷晴空而震識者疑
為星隕至今君子追思其事而三歎焉

林志

按安志於南安名宦有宋一朝只載十人而張齊
賢孫沔岳飛程大昌趙希憚俱以統轄闖入則專
治南安者守令僅五人而已因從宋史明一統志
林志郡志及諸文集增補如右

原跋

元

張昉南安路總管始至即知閭閻疾苦奏罷不急之科
作石堤以息水患凡有利於民者為之無遺民為立

生祠

豫章書

王虎英字雄甫歷陽人大德中為南安路總管專行政
教尤盡心於學校改剏大成殿增飭學舍今規模制
度皆其遺跡

林志

汪澤民字叔志婺源人延祐進士授承事郎同知岳州
路平江州事遷南安路總管府推官鎮守萬戶多爾

濟持官府短長郡吏王甲毆傷屬縣長官訴郡同僚
畏多爾濟託故不視事澤民獨捕甲繫之獄多爾濟
賂巡按御史受甲家人訴欲出之澤民正色與辨御
史沮怍夜竟去乃卒罪王甲累官至禮部尚書致仕
元史

毋毖南安路總管克修其官飭修廟學時稱賢守

明一

統志

張元祚南安路總管薄賦斂省冗費嘗修平政橋以便

民往來凡一事不獲自盡寢食不安邦人德之

同上

趙明字明之大梁人至治間上猶尹常禱雨雨至逐蝗
蝗去驅厲厲息人以為異時營前二倉輸糧有屯軍
阻撓乃躬自部率軍豪帖服宿弊以革民為立碑以

紀其績

同上

明

于潤珪吳元年守南安當國家肇造之初宣威布澤綏
懷安集凡城池廨宇學校橋梁廢墮者修舉一新

林志

周以中字道和直隸人洪武初知南康廉以律已信以
示民先是民頗荒阻慢令惟以中能信服之凡有名
役給片札無後期者

明一統志

吳履字德基蘭谿人李文忠鎮浙東聘為郡學正久之
舉於朝授南康丞南康俗悍謂丞儒也易之居數月
摘發姦伏如老獄吏則皆大驚相率斂跡履乃改崇
寬大與民休息知縣周以中巡視田野為部民所詈
捕之不獲怒盡繫其鄉鄰履閱獄問故立釋之乃白

以中益怒曰丞慢我履曰犯公者一人耳其鄰何罪
今繫者衆而捕未已急且有變柰何以中意乃解邑
有淫祠每祀有蛇出戶民指為神履縛巫責之沉神
像於江為丞六年百姓愛之

白志

高敏道安陽人永樂初以給事中左遷知上猶悉心撫
字賦役均平民皆樂業

林志

趙時中厯城人永樂間守南安為政廉勤勞於撫字名

聞鄰境

明一統志

齊原銘湘潭人宣德間知南康廉介有為愛民興學在任十二年士民懷之

林志

按南安府志稱原銘以民少賦重奏移繁役以蘇邑困

林平黃巖人由舉人正統中知南安府練達政務裁決如流刑無濫及政暇從容詞翰卒於官民哀慕之

明一統志

郭誠通州人正統中守南安剛直勤敏興學修先賢祠及津梁驛傳關繫民事者罔不修飭大庾有荒原高阜

誠相度地勢開鑿溝渠引水溉田至今民享其利

林志

許南傑餘姚人正統中守南安剛敏端恪妖賊孫佛羅等倡亂詔籍其黨民有被誣在籍中者悉白其冤

同上

劉琮金華人正統中為南安通判多善政有膽畧石溪妖民孫志恭稱亂琮親冒矢石一鼓平之民賴以安

明一統志

徐宗傑金華人正統中橫浦遞運所大使南源山賊羅大師寇城宗傑率民兵捕戮之奮勇先登得以成功

林志

汪惠達常山人正統中為南安經歷時大庾縣有失額糧一千七百三十餘石民苦賠納奏豁除之

同上

張弼字汝弼華亭人成化進士授兵部主事進員外郎遷南安知府地當兩廣衝姦人聚山谷為惡悉捕滅之毀淫祠百數十區建為社學謝病歸士民為立祠

白志

夏璣字德乾蘇州人成化初知大庾縣寬廉愛民府學

及道源書院皆其修葺祭器舊用陶以青金易之

府志

毛智仁和人弘治中知南康廉慎有為權貴度關射利貨殖者不容匿稅贈遺雖微物不納遷改縣治極力

區措民力不擾入覲辭官而去

林志

鄧應仁字子榮南海人弘治末知南安府廉靜平恕門無私謁在任數年惟攜一童自隨去後民思之有肖

像於家者

同上

黃璋順德人由舉人正德間知南康廉介自持剛毅有

執立旌善懲惡二牌於要地善惡直書其名衆皆服

其公

同上

按南安府志云丙子峯賊謝志珊逼城七日璋率

民固守措畫有方城賴以全

趙鶴字叔鳴江都人歷郎中以忤劉瑾左遷南安同知

時峒寇犯境率兵迎敵寇掩至昇到營鶴危坐曉以大義賊曰若多如趙東街吾輩豈至此乎翼送歸郡

安志

虞鉞字剛夫義烏人正德間任上猶教諭時輦賊負險
士多廢學鉞善易親授生徒講習不倦以老乞休諸
生追送至虔猶不忍別其子文詡字廷曾由舉人守
南安亦有惠政人為立碑以頌之

府志

洪聰字謀甫晉江人正德末知南安府以地僻民寡不
及他郡一縣凡上供之費力請減損民甚德之

同上

鄭東龍溪人嘉靖間知南康清儉豈弟凡關民生及學
校事咸誠心為之立社學開便民門起敬一亭築學

前逆水砂及填學後低陷地士風大振

同上

胡鑰字時準崇德人嘉靖間知上猶縣才幹通敏興利去弊學校縣治一一鼎新凡濠池街衢水道之屬皆盡力規畫民不勞而事集尤長於詩文有重齋集以計典謫袁州府教授士民深惜之

府志

吳鎬字宗周績溪人嘉靖舉人知上猶縣實心為政禮士愛民築城垣修學舍置義田以備祭祀餼脯士赴選舉者勉驢以勸邑之重役若夫馬船價路費及修

葺公廨諸科條皆加意裁恤釐載石碑纂修縣志捐俸授梓時有劇盜據險積年為患鎬設計誘撫密練鄉勇乘不意搗殄之捷聞欽賜銀幣陞安州知州士民攀留不得立祠祀之

江南通志

林舜道字允中閩縣人嘉靖乙未進士為南安知府深知民間疾苦清操甚勵地當江廣之衝車騎絡繹一切供帳多所裁省自隨惟一篋貯冠裳及敝衣數襲而已攜一僕備役使郡舍蕭然秩滿陞四川副使轉

貴州廣西參政卒於官僚屬賻之始得就歛歸櫬貧不能葬同年生王世懋為買地營窆焉

福建通志

谷同字用中南陵人嘉靖十五年知上猶縣清介自持以培善抑強為已任豪民悍法必嚴治之洪水衝決西城數十丈同捐贖鍰募工修築未嘗擾民

上猶志

周鏜邳州人嘉靖進士知南安府性強毅兼善騎射廣東流寇至率家衆十數人在橫浦橋邀擊之發一矢中挈旗者再發再中賊懼而走郡城得全

府志

劉鑰號東臯四川人嘉靖間任崇義縣簡催科捐俸葺

官倉大修學宮有碑記

崇義志

支

府志
作文

體義全州人嘉靖舉人知大庾縣先是流寇兩

至邑體義請發公帑築水南新田鳳凰山九所等城

共六座規畫周詳民恃保障

安志

余世儒字汝為婺源人隆慶初知南康縣條鞭法初行人情觀望世儒獨盡力蠲革一切弊征為嶺北諸邑

倡

府志

吳江字元濯宿松人萬厯七年任崇義縣開狗脚嶺路

建朝天關修學宮御史陳炯記之

崇義志

葉明元字可鳴同安人萬厯間知南安府太庠學自天

順時併郡學中道源書院亦裁廢明元入覲具疏奏

復之詔如其請

府志

陳誥字吳甫莆田人進士萬厯三年知南安府高潔方

雅簡獄訟修學宮導誨諸生如帷中弟子在任五年

時和歲稔人以為德瑞陞浙江按察副使晉參政

同上

宋萬葉莆田人進士萬歷七年知南安府方正詳慎政
簡刑清葺書院修橋梁清郡中虛糧甦民積困民德
之立祠以祀遷雲南按察司副使

同上

洪有助字懋孫福建南安縣人進士萬歷間任南安推
官高潔明敏鄰郡之訟皆歸焉嘗攝大庾南康清洗
宿弊立徵收串票之法無重追虛納增減之害兩邑
愛戴尤擅文學郡邑士人多師之累官廣州知府

同上

劉宦成衡陽人萬歷十年知大庾縣徵收額賦分起存

二款起運則徵銀存留給發則令募人兌支銀穀布
縷隨便民甚德之庾縣學新復一切堂齋砌建俱極

詳妥

同上

趙日榮字巨甫晉江人萬歷十八年知南康廉明惠愛
甚有才畧立社倉裁鹽餉置學田在任五載吏畏民

懷

同上

汪承爵字仲修歙縣人由進士萬歷二十三年知南康
縣操守嚴重葺學舍闢旭山書院率諸生課藝其中

同上

林際春號懸釜泉州人萬厯間由舉人知崇義縣修公署葺城垣建尊經閣置朱子祠祀田重建王文成祠葺崇義邑志其鰓本皆手書蓋際春工文章尤精書法云

崇義志

陳瑾號白岳宣化人天啟壬戌以舉人知南康廉能明允斷獄如神新文昌塔築西流堤一切無名之徵及健訟猾蠹皆力除之在任七載陞海防同知

府志

龍文光字煥斗廣西人由進士天啟四年知上猶縣剔
姦格頑境內寧謐嘗建鳳閣立觀瀾社所著社約猶
士迄今佩之調繁新建

同上

宋本忠山陰人崇禎甲申任南康典史時聞賊猖獗四
方擄掠逼城幾陷本忠晝夜巡防賴以固圉後竟
殉難士民哀之

同上

國朝

鄭思魯號明宇遼東人順治壬辰知南康縣邑當殘破

後如丈田徵賦招攜勸墾儘費拮据更建文廟新譙樓修舉廢墜民咸德之

南康志

梁爾壽字山公涇陽人康熙十七年知崇義縣兵氛初息室廬邱墟爾壽多方招徠貸贖州漕米及買六畜之屬民之歸集者予以牛種牲畜又捐勸學宮民至今感之

劉汝崇義志

白啟明字見宸遼東人由舉人任廣東清遠知縣康熙十五年舉首逆書導引大兵出粵奉

旨嘉獎擢南安知府值平定之初流民失所招徠開闢協濟軍需境無騷擾建奎星閣以興文教飭保甲弭盜賊三十三年擢贛南道捐修瀘溪書院巡撫宋肇記其事歲歉設法賑濟饑民全活者無算

南安崇祀錄

馬化龍字雲津遼東人康熙二十年知南安府事草火耗除科派倡修文廟開設義館政聲大著

同上

張為煥字允文太倉人明庶常溥之族孫庚戌進士授雲南某縣補任崇義甲寅乙卯間兵燹交連楚粵盤

踞峒穴者猶未盡戰為煥至歎曰去萬里外之洱海
而來蒲伏此箐嶂其命也夫雖然要有前槩在購文
成公橫水方畧條件倣行之表險害置土兵編閭伍
嚴保甲風俗稍馴興義學勤課試重葺王文成祠尋
以老乞歸

同上

靳襄字天垣鑲黃旗人由例監累陞南安知府作興學
校重建周程陽明書院革除陋規禁加派葺城垣遇
旱虔禱設法賑濟士民懷之

同上

陳奕禧字香泉海寧人康熙四十七年由戶部郎出知
南安府倡修學宮詳除板運減免陋規纂修郡志工
書法人爭寶焉

同上

贛州府

宋

王歆之字叔泰河東人宋武帝孝建中為南康相歷官
左民尚書光祿大夫在國時嘗撰南康記元嘉九年
豫州刺史長沙王義欣上言所統官屬清節績能歆

之與焉奉詔褒美

宋書

陳

宗元饒南郡江陵人性公平善持法諳曉故事明練治
體吏有犯法政不便時及於名教不足者隨事糾正
高祖大建間遷南康內史以秩米三千餘斛助人租
課存問高年拯救乏絕百姓甚賴焉以課最入朝加
散騎常侍終吏部尚書

南史

唐

許圜師安陸人擢進士第龍朔中為左相免官久之為
虔州刺史專以寬治州人刻石頌美部有受賕者圜
師不忍按但賜清白箴其人愧自修飾更為廉士進

戶部尚書卒謚曰簡

唐書

張九臯曲江人九齡仲弟孝廉登科嶺南按察尚書裴
仙先表授海豐司戶及仙先討五溪蠻奏授贛縣令
軍興倚辦供億無留宣慰使梁勛竹承構先後奏其
戶口增益清白有名褒進朝散大夫尋改授南康別

駕以便省覲累遷殿中丞尚書職方郎中

府志

按唐書張九齡傳弟九臯亦有名終嶺南節度使而不立傳且在嶺南時崇供楊妃織繡之工多至七百人以所獻精靡加三品頗為時議所疵

原跋

裴諤字士明聞喜人禮部尚書寬之子大歷間出為虔州刺史歲旱諤禱於儲潭之神翼日大雨從弟曙撰祈雨感應頌宗人弘書之碑存廟中

同上

路應字從衆京兆三原人以父嗣恭蔭為著作郎貞元

初出為虔州刺史鑿贛石梗險以通舟道終左散騎

常侍

唐書

按林志云應奏割雩都地置安遠縣陶甓以完城
逢水旱賤出穀俟歲熟收之常有贏利人不病饑
而官府有蓄積

張署河間人德宗時以進士舉博學宏詞累遷虔州刺
史民俗朋比殺牛又多捕烏雀魚鱉相買賣期放生
為福署一切禁絕使通經吏與諸生之旁大郡學鄉

飲喪婚禮張施講說民吏觀聽從化度支符下折民
戶租歲徵綿六千屯比部承命惶怖署獨疏言嶺民
不識蠶桑難以供辦月餘免符下民相扶攜守州門
噉謹為謝改澧州刺史終河南令見昌黎集墓志府志
馬總字會元系出扶風元和中為虔州刺史廉清不撓
用儒術教其俗政事嘉美歷官太平軍節度使入為

戶部尚書

唐書

王揆字孔度黃岡人泰和六年令虔化築子城濬濠池

建解舍創始之功居多

林志

五代

周章字仁績

縣志作
章仁績

顯德間知寧都縣增葺子城為防

禦計

林志

宋

楊澈字晏如建陽人建隆初進士江南平通判虔州令就大將曹彬分兵以行既入境偽帥郭再興擁兵自固澈單騎直趨其壘諭以朝廷威信再興即奉符以

代澈悉料城中軍士之勇壯者凡五百人為一綱部
送京師土豪黎羅二姓聚衆依山謀亂澈率兵平之
械送闕下遷右贊善大夫

豫章書

王協太平興國間知虔州奏析贛縣地置興國縣

林志

陳從易字簡夫泉州晉江人進士及第知虔州會歲大
饑有持杖盜取民穀者請一切減死論凡生者千餘
人入為左司郎中知制誥

宋史

張式字景則建州建安人天禧進士景祐間知虔州虔

於東南州為最劇式鎮撫之以無事三司市綢絹十
餘萬非經數式拒勿市民以守為有賜也式廉靜好
書長於政事見時事有不便往往能極言之無所忌
所居官既去而人見思仕至尚書祠部郎中

臨川集

陳希亮字公弼眉州人天聖八年進士知雋都有老吏
曾腆舞法弼獄以希亮年少易之希亮廉得其重罪
腆叩頭出血願自新希亮戒而捨之暨修學腆捐家
財助官遣子入學卒為善人巫覡歲斂民財祭鬼謂

之春齋否則有火災民謠言有緋衣三老人行火布
亮禁之民不敢犯火亦不作毀淫祠數百區勒巫為
農者七十餘家及代去父老送之出境泣拜曰君去
恐緋衣老人復出矣

東坡集傳

程戡字勝之陽翟人進士仁宗時通判虔州州人有殺
母暮夜置尸他人門以誣仇者獄已具戡獨辨之正
其罪歷官參知政事

豫章書

趙抃字閱道西安人進士嘉祐間知虔州召戒諸縣令

使人自為治令皆喜爭盡力獄屢空改修鹹法疏決
賴石民賴其利造舟百艘以給二廣諸郡仕宦沒而
不能歸者

明一統志

沈希顏字幾聖明州人嘉祐八年知雩都縣公宇有妖
禽夜啼甚哀希顏題詩於所棲樹遲明禽飛去縣西
峽路崎嶇鳩工開鑿遂為坦途

府志

孔宗翰字周翰道輔之子登進士第知仙源縣為治有
條理王珪司馬光皆上章論薦知虔州城濱章貢兩

江歲為水齧宗翰伐石為址治鐵錮之由是屹然詔

書褒美歷陝揚洪兗州皆以治聞

宋史

孫復字明復平陽人石介之師范仲淹富弼薦復有經術除國子監直講慶歷七年徐州狂人孔直溫謀叛捕索其家得所遺復詩坐貶監虔州商稅嘗作贛縣孔子廟碑翰林學士趙槩等言復行為世法經為人師不宜佐州縣乃復為國子監直講

府志

劉彛字執中福建懷安人幼介特嘗師胡瑗擢進士熙

寧中以運判知虔州虔俗尚巫鬼彞斥淫巫三千七
百家使以醫易業習俗遂變時饑民多棄子立法收
養日給官米二升月一驗視一境無夭閼時有甘露
瑞蓮瑞粟之應城東北瀕江彞作水窗視水消長而
啟閉之水患遂息元祐初召為都水丞

豫章書

錢顗字安道無錫人初為海寧軍節度推官知贛縣事
以治行聞治平末以金部員外郎為殿中侍御史裏
行蘇軾贈詩有烏府先生錢作肝之句因號錢肝御

史 宋史

楊時字中立將樂人熙寧九年中進士第師事河南程
顥學者稱龜山先生任虔州司法州有疑獄衆所不
能決者立斷之累官龍圖閣直學士卒謚文靖

林志

王禹字景和崇安人皇祐進士熙寧中以著作郎知雩
都民素器訟禹圖古人之孝義者列其事勸誘之逾
年訟息縣南有泉灌田千頃忽產鉛錫使者欲置官
治禹力爭遂寢其議改朝奉郎判婺州

府志

謝麟字應之甌寧人嘉祐進士元祐間知會昌有民被
酒夜與仇鬪既歸為親屬所殺其家誣仇者獄久不
決麟知死者無子所親利其財故殺之訊鞫輒得真
情邑稱神明

同上

蔡懋字子堅仙游人襄之曾孫靖康中為會昌尉遇賊
犯境領所部及土兵禦之力戰遇害贈承事郎官其

子

同上

魏懋字覺民甌寧人由進士紹興初知雩都事江西盜

起虔諸邑多失守懋出帑金犒勵誓與死守寇攻城
累日不能克遁去岳飛提兵過雩見井邑俱無殘毀
甚稱賞之

豫章書

李畊先為忠州團練使紹興二十二年禁兵齊述殺統
制吳進同統領馬晟據贛州畊奉詔致討兼知州事
屢下金字符許從招撫畊遣辨士諭以禍福令出降
不聽乃大修攻具刊木輦石破其城盡收賊黨誅之
捷聞轉觀察使畊披灰燼瓦礫立治所為叢冢收葬

死於兵刃者

同上

劉藻字廷潔南雄人紹興間知雩都設事布置悉有程
度首興學校修築城池勸民畊織刊布前令王禹所
作孝義圖舊本使民誦習邑民化之秩滿去民為立

祠

府志

陳剛中字彥柔閩清人任太府寺丞紹興中胡銓上封
事乞斬秦檜謫廣州剛中送之貶知安遠時與張九
成等七人同謫故詩曰同日七人俱去國何時萬里

許還家竟卒於官

豫章書

李寰字畿卿郴州人紹興間知寧都利弊無不興除梅
江水漲涉者易溺寰作橋以濟民爭趨役將代猶夙
夜董勸畢役而後行父老感其德為立祠廬陵楊萬
里為之記

府志

趙汝回大梁人紹興間任會昌州時閩廣寇起民度竄
徙邑里蕭然汝回募義勇以備戰守築城池以為保
障招流逋以實村落寇知有備竟不敢犯民賴以安

林志

趙善繼紹興二十四年知贛州以興學宣化為首務先是府學罹於火至是重建張九成記之居常勸民為善頑梗者必繩以法踰年風俗稍變訟牒希簡百姓愛戴之

府志

薛弼字直老温州永嘉人政和進士紹興二十五年以左司郎官知贛州武夫周虎臣陳敏者善戰丁壯各數百視官軍可一當十弼善待之後福州大盜有號

管天下伍里龍滿山紅之屬衆甚盛詔升弼集英殿
修撰往知其州弼乃奏虎臣為副將敏為巡檢選兵
壯千人號奇兵日給糗糧責以滅賊凡四年而賊平

擢敷文閣待制

宋史

段秀實隆慶間知龍南縣事以縣治毀於寇嘆曰百里
之地惟民具瞻積歲不理令之耻也爰率民肇築土
城凡廳堂庫舍輪奐一新

林志

趙公傅宗室紹興中任贛州隆興二年收有寬剩錢十

餘萬請為民代輸夏稅

府志

羅願字端良新安人以父吏部尚書汝楫蔭補新城縣
監稅乾道二年擢進士第八年通判贛州攝守事以
簡易為治贛人化之部使列其治行以聞從臣又交
薦其才歷知鄂州卒有鄂州集

府志

莊夏字子禮泉州人淳熙進士慶元六年大旱詔求言
夏時知贛州興國縣上封事曰君者陽也臣者君之
陰也今威福下移此陰勝也積陰之極陽氣散亂而

不收其弊為火災為旱蝗願陛下體陽剛之德使後
宮戚里內省黃門思不出位此抑陰助陽之術也召
為太學博士累官兵部侍郎煥章閣待制與祠歸

宋史

按贛州府志朱夢龍生祠記永豐民孫六毆妻妻
自剄死六懼夜昇屍興國田中宣言盜自興國掠
殺夏密令人視六家則土屋繩樞死者則蓬頭禿
項也乃面詰六曰盜何利而劫掠及汝乎六語塞
自是民不敢欺嘗却添給錢九十餘萬為下戶代

輸逋欠五十三萬餘則以給公家之役民感德繪
像祠於學宮

趙善佐字佐卿宗室居邵武受學於張敬夫又從朱元
晦遊淳熙中知贛州奉法愛民以勤儉自約飭不妄
費公帑干請無所應在任踰年卒民哀思之

府志

王柟字木叔温州永嘉人乾道進士知贛州先禮教後
刑罰先是元祐禁錮贛士與者十四人柟舉以諭其
耆老曰汝州多正人如此將百世稱之後生可不勉

乎哉民皆興起遷善遠罪或夜不閉戶俗工麻苧鮮
絲纈枹課種桑多者減役贖罪贛廣間販鹹號鹽子
所過輒殺傷官軍故有鹽子獄枹申嚴保伍須行者
給憑乃聽由是十省八九提刑者意不合毀之於朝
罷主冲佑觀士民雪涕前後擁不得行枹曰太守數
易古矣今不去後當去耳賦詩留別贛人刊而祠之

葉水心集

沈木崇德人嘉定進士知石城縣時汀寇入境巡司以

同姓者指為賊木察其非是破械與約使捕熊子開等以自白已而果縛以獻人服其明

府志

萬億嘉定間知信豐縣事舊無城池億庀工傭役百雉屹然先是有讖云上門驅山下門塞海若要成城除

是萬載至是乃驗

林志

鄒應龍字景初泰寧人慶元進士開禧初忤韓侂冑出知贛州建慈幼院牧養民間所棄子女寒暑有衣疾病有藥襁褓盟櫛各有司存所賴全活甚衆終資政

殿學士

府志

陳孔碩候官人嘉定間知贛州事摧強植弱子惠黎元先是豪家沿江障水作碓以射利水湍急奔射舟行多覆孔碩盡去之前患乃息子韡紹定間復知贛州

進江西安撫使

同上

魏泌字深甫常山郡人嘉定九年知寧都事捐俸七十萬緡購田八十畝以贍學躬勤課校於時登賢書者十有二人又建梅江石梁二百餘丈民不告勞

同上

司馬蓮字及之文正公光裔孫慶元三年知贛縣事時
學舍久圯不治蓮慨然以修建為已任舊廩歲輸二
百斛緡錢僅以百計蓮括六鄉閒田之所入益錢至
三倍請於州選補生員寢食於學月書季考以督厲
之文風郁然

周必大學記

葉湜字子是建安人少遊朱文公之門以父任得邵州
新化簿改尉寧都有劇賊數十人深入廣石為號已
易服遁歸廉得其根盡傳之法後以宣義郎知贛縣

一以所得於師者施之政督吏胥不少假借而以家人父子遇其士民兩造至庭一見即決無所宿滯邑有田訟更數令不能辯枉直湜一見詰問具得其情

縣人稱神明

真西山集

林光裔福州人嘉定十二年知寧都周知民隱舉行荒政邑俗多溺女光裔儲米為舉子倉積俸為舉子錢貧民生女者鄰里以聞先給錢米養產母閱月抱女至庭驗視則月給米三斗至周歲而止行之數年全

活甚衆

府志

高照邵武人以進士任贛州司理參軍有盜驅脅良民利賞者捕之將論死照察其枉出繫者百餘人

同上

楊珏字君寶紹定進士淳祐元年調贛州教授先是學計蠹於前官廩餼不給珏捐私橐以助後改通直郎知饒州官至朝議大夫

同上

趙紉夫福州人紹定四年以贛尉攝寧都縣時石城寇黃元仲僭號狂逞紉夫葺城濠為守禦計賊圍城登

臺射之稍退率兵追北遂禽元仲嚮於市明年還職
父老磨石紀其功尋知本縣在任能聲益著

同上

劉弁字清叔寧化人端平進士歷會昌尉知瑞金事築
城建學以平洞寇功改京秩終奉議郎

同上

趙時儋紉夫從子景定中知寧都事先是磔下賊廖四
猖獗勢將逼城時儋在道聞警單騎疾馳至邑選募
義丁禦賊勸諭富民出資以給兵食與賊戰大敗之
斬其渠首縱火焚賊砦殆盡

府志

吳柔勝字勝之溧水人舉進士第授嘉興教諭御史湯碩劾其主朱熹之學不可為人師改贛縣尉韓侂冑用事學禁甚厲柔勝獨講學不輟人以此服之時謫宦嶺南者多歿於瘴還過贛妻孥率流落可憫柔勝置廣惠館括閒田所入待之提點刑獄司辟為屬獲盜當改官柔勝曰豈忍以人命博一官丐祠歸

府志

元

陳泰字志同茶陵人延祐進士尹龍南修學校賑恤貧

窮境內又安時信豐洞賊臨境泰率兵與戰於犁鼻山敗績死之士民悼痛收葬馬鞍山之原立祠祀之

府志

達實蒙古人泰定中贛州路總管攝寧都縣事時羣醜嘯聚境內獨安田覈未精賦浮於額遂稽實奏免虛糧五百餘石斷獄得情徭役稱力民多悅服為立碑

紀之

林志

德古爾丹蒙古人至正中為贛州路達魯噶齊廉知郡

中豪右武斷因獄為市者悉裁以法不數月令行禁止因嘆曰吾民幸知向背不進之以禮未善也於是飭學舍延師儒闡明教化俗亦少變見輟畊錄

府志

按輟畊錄載德古爾丹字志道守贛州路任滿聽除時有故吏丘往臨江貼補介志道書見總管茂巴爾既得錄用就遣丘持俸鈔五十錠餽志道蓋以廉故家甚貧朋友間每分財以濟之丘竟匿其鈔後總管得書而謝不及此疑焉便使問之志

道知丘匿具書請失謝之罪丘聞惶赧奉鈔還志
道不受且隱其惡未嘗與人言

噶海齊至正十六年繼沁布阿咱爾守贛長於弓馬力
能射虎偽兵至死守食盡或請降噶海齊曰我奉命
守土何敢負國爾父老完首領保妻子宜也我固自
有處及被執見偽兵大罵曰與爾戰者我也速殺我
無殺我百姓遂遇害

陳海桑集

王榮忠岳州人至正間贛州判官時盜擾寧都掠興國

陷會昌榮忠與賊戰於萬石俘馘三百有奇克復各
縣駐劄雩都相形勢以建城募義勇以禦賊賊復集
五千餘人攻雩都榮忠身先士卒列城分守矢石交
下賊死幾半命子收公私銅鐵鎔液澆注賊由是潰
追擊又大破之雩民羅拜曰再生我者公也

豫章書

朱克敬至正末任興國尹邑常賦七千屯田襍賦不與
焉自楊吳南唐割據歲倍取之民不堪命克敬上其
事於府率吏民泣訴當道憫其誠與之申請未幾命

下民額手相賀泰和陳謨作申免倍徵序以頌其德

滋水志林

明

鄒奕字弘道吳江人元至正中進士明初任御史出知
潁州時天下初定郡縣規制一切草創奕至建社稷
壇於西津門風雲雷雨山川壇於鎮南門置厲壇於
府城北又建遞運所館驛陰陽醫學百廢具興坐事
謫甘肅永樂初以蹇義薦召還

府志

崔天錫字彥才贊皇人由賢良舉歷官有聲明初取贛
州即以天錫知贛縣草昧之際事多創造重建縣治
及明倫堂濂溪書院造浮梁以濟章貢二水先是至
正戊戌邑罹僞漢兵火版籍燬棄靡遺公私交病天
錫多方訪求令民具實自呈及互相參覈既有次第
復按行封畝度田廣狹肥瘠率三十而取一糧覈後
均人民稱便在任九年陞廣州知府

同上

查允中休寧人洪武間知雩都縣時流賊犯境征南將

軍帥師討之應給軍需民不告擾及賊平撫綏黎庶
奏蠲糧額至今民思慕之

林志

黃六八寧化人洪武間知會昌縣事時有草寇剽掠六
八請兵護守勦捕而饋餉不絕人多才之又奏除賦
稅以安民立軍鎮以衛民遂為定制

同上

陳九思浙江人洪武間龍南教諭奏免贛郡秋糧三千
有奇民困以蘇百姓立祠祀之

同上

莊濟翁泉州人洪武間知寧都縣事勸農興學雖閭巷

小學師生亦令朔望赴邑庠聽講遠近聞風而化懲
豪猾修陂塘造梅川橋人懷其惠

明一統志

李子昭博野人洪武中以人材舉為信豐丞自廣寇剽
掠之後民竄田荒子昭奏蠲稅額十之八又請立戍
屯田為守禦備自是流亡復業而防衛亦有攸賴云

信豐志

唐子儀名文鳳以字行歙縣人洪武中以文學徵授興
國知縣教民力本務農嘗出郊躬勸勞之造士日有

程課寒暑不輟擢趙王府紀善

潯水志林

陳大本無為州人洪武中任贛州同知撫民以寬臨吏以莊應務以敏尋陞本府知府吏民熟其政雖公務煩劇凡所號令不勞而集遷浙江參政

明一統志

戈文七金壇人洪武間知龍南縣事值廣寇兵火之後百務廢陞文七奏減糧稅省冗官招撫流竄勸課農桑歷任三年民懷其德

林志

朱伯齡金華人洪武間任寧都縣主簿政多惠愛時寇

剽掠之餘徵賦如舊伯齡為覈荒蕪奏免租稅民甚

德之

同上

楊霄遠洪武間任安遠典史時民寡役煩霄遠考績時

奏減賦稅民始樂生為立祠以祀

同上

按安志作楊霄漢

許庸廣東石城人永樂初知會昌縣莅政公勤庭無留

滯遇工作貧者驗丁以出力富者量財以供費民樂

趨事在任八年修學舍勵生徒積年逋逃皆聞風歸

籍以艱去民思慕之

明一統志

李素字宗文蒼梧人永樂進士宣德元年知贛縣修廢
舉墜驅蠹釐姦得良牧體邑之建春門東津渡西津
門知政橋儒學殿堂齋廡皆其剏修歲荒勸富民出
粟以賑秩滿報留踰十五年進俸正六品

府志

黃恭松江人由鄉舉正統中知贛州府精敏有才盡心
民事尤惓惓學政去後民有餘思

同上

陳璉興化人由鄉貢正統中知興國縣清勤不懈多惠

政築長信里堰塘母喪去民走訴上僚挽留之得請
於朝服闋再任三載

同上

鄭暹仁和人由舉人正統初任贛州通判莅事有聲戊
辰盜起躬率民壯保障郡幸無虞當道以聞陞知府

去

同上

王學古交趾人正統間知信豐縣事廉介寬厚嘗招徠
蠻洞列為編戶里甲以增巡撫侍郎楊寧奏其功陞
授六品致仕後家於信豐

林志

唐瑜辰溪人由舉人正統九年知龍南縣自洪武末裁

并學校以生員隸之郡庠黌舍遂廢瑜疏請復之

府志

周昂字時舉曲江人正統丙寅知寧都持廉秉公勸農
興學戊辰閩寇鄧茂七倡亂連破石城瑞金二縣昂
豫為武備伺寇至即督率勇壯與賊戰於東龍屢有
擒獲已又敗之於上礫又敗之於白玉賊遁去論功

陞本府通判

同上

黃振沙縣人正統間知安遠縣慈祥愷悌喜怒不形在

任九年人咸戴之

林志

阮衍交趾人正統間知瑞金時流賊之後官兵繼擾衍立法防制兵不敢犯撫瘡痍招流亡民懷其惠

同上

楊友諒雲南廣通人成化間知龍南縣事性素忠實政務老成民咸樂之會司府檄田升科友諒仗義執言力為分辨得豁狃滿民遮道攀戀留一犍而去

林志

顧睢字明德長洲人正統進士改庶吉士天順末謫知潁州長河峒氓獷悍時出剽掠縣匿不以聞睢疏言

用兵事宜迄平之賜以金綺唯有治才遇事裁決無
難易無不立辨豪猾歛手吏不敢欺

分省人物傳

張勝麻城人天順六年任雩都典史長河峒賊竊發勝
率民夫陳世用等禦之賊圍急援兵不至皆死於陣

雩都志

姜璉蘭溪人天順進士成化七年以海寧州守遷知贛
州繕城池實倉廩防賊寇改建郡縣學治行為江右

第一

林志

崔惠晉江人舉人素慷慨負大節任石城縣學教諭正統戊辰叛寇陳椿陷城被執罵賊不絕口會賊焚草營遂投火自焚死

福建通志

李璉字純夫懷寧人進士成化間知贛州府興學校修城池建府治郡罹大水疫疾盛行璉賑濟全活甚衆閩廣流賊犯境率民兵躬冒矢石平之士民感頌不

置

豫章志

王廷珪湖廣人舉人成化間任贛州同知流賊犯境率

民快乘銳倍道臨寇援兵不至竟死事聞贈官秩錄

其子

同上

項德輝建城人由鄉貢成化十四年知龍南縣舊例秋糧轉運於郡暨會昌興國等縣灘高石險時有漂損領運者苦之德輝疏請改折民困大蘇

府志

達泰麗水人成化舉人知興國剛介廉慎流寇肆毒靈雨城壞民甚恐泰併力修葺寇不敢犯卒官民祠祀

之

同上

梁潛字孔昭由鄉舉成化十六年知會昌居官廉勤修
敝舉廢加意學校農桑長河峒素稱頑梗潛至聽其
教令編戶日增邑治改觀

同上

章廷圭字文瑞石埭人由鄉舉成化八年知興國以興
學勸農為首務冠躋鄰封且及境廷圭選丁壯教以
武畧寇不敢犯有甲乙相構而甲病死者舁屍以誣
乙瘞之於庭遂為厲乙家暴死者三人廷圭得証狀
治甲罪而厲息邑有牛牯陂澮高不能通水廷圭相

度上流鑿石引水自蘇陂至竹壩延袤二十里歲增穀數千石遷倖衡州補贛州南村峒寇李福正剽掠殺人出沒汀邵間廷圭相機擒之四封晏然

同上

張璵字孔圭浦城人成化庚子鄉舉授贛州推官時汀韶寇侵贛境重以饑疫璵持檄走諸邑增治城濠勞來周恤民賴以安治獄多所平反弘治間秩滿陞本府同知

同上

聞韶羅田人由鄉舉成化二十一年知石城縣才識通

明幹辨敏給防禦廣寇兵食恒足開拓城池至今賴

之

同上

黃世忠字孝卿長樂人由鄉舉弘治初知贛縣持性堅
定敷政平易贛俗信巫世忠毀淫祠百餘民咸感化

林志

甘文紹桂平人由鄉舉弘治二年知安遠邑故土城陶
甃改築廣積貯以備儉歲新文廟以振士風當流寇

後勅建一新陞瑞州通判

府志

朱諫字君佐樂清人弘治進士正德癸酉知贛州有賊
棲大帽山山延袤閩廣千餘里中多谿谷賊憑要害
時出為民患諫舉兵壓賊境歷行盤龍嶺諸寨下令
曰能捕賊者即以所得賊貨充賞人懷利競赴旬日
殲渠魁俘數千人餘衆悉降乃散置於安遠龍南諸
所給之牛糧遂盡為良民移知吉安謝事歸

分省人

物傳

蔣曙字景明全州人弘治進士知贛縣節愛寬仁先是

郡中職清戎者歲計三分以為政績故絕軍已歷百餘年者往往械繫戶丁遣送戍所曙至核實分辨請於清戎直指除豁甚衆顧猶有漏者越二十年曙遷江西右轄總清軍事於是力請於直指朱袞為之覆疏曙入覲又請於大司馬絕軍之續補者俱得如奏名數盡除其籍民獲更生至今受其賜

府志

萬琛字廷獻宣城人由鄉舉初選清江令弘治甲子補瑞金居數月廣寇乘元旦夜殺門卒攻城突入琛從

兵壯數十人迎敵相持經日力屈遇害時弘治乙丑

二日也守臣上狀詔贈光祿少卿賜祭葬蔭一子

同上

蔡夔南寧衛人由鄉舉弘治十八年知寧都有惠政正

德七年補安遠時何積玉將據城以叛夔焦勞備禦

密集忠勇畫計擒積玉餘黨解散地方獲安

同上

王天與字性之興寧人正德進士知寧都廉平有政績

丙子從督府王守仁征橫水洊頭桶岡龍川諸寨有

功陞俸二級己卯從討宸濠冒暑疾作卒於軍守仁

哭之哀解衣為殮明年錄平逆功優卹其家邑人肖

像祀之

豫章書

邢珣字子用當塗人弘治進士正德初歷官南京戶部郎中忤劉瑾除名瑾誅起南京工部遷贑州知府招降劇盜滿總等授廬給田撫之甚厚後討他盜多藉其力巡撫王守仁征橫水桶岡珣常為軍鋒功最增二秩宸濠反以重賞誘總總執其使送珣遂從珣共平宸濠珣遷江西右參政世宗錄功增秩二等

白志

黃泗福清人正德中由鄉舉知興國先是劇賊鍾仕錦
何積玉騷動江廣間支黨掠興國泗至值焚蕩之餘
民日夜相驚恐寇且至乃募壯丁守城沿城設警鋪
二十四以處之建樓城上重構文廟齋廡而按追田
塘之侵蝕者以贍學毀諸淫祠改建三程祠移安湖
書院於學宮時王守仁方撫虔唐龍視學江西俱極
嘉獎之

府志

祝詠字鳴盛衡陽人嘉靖進士歷戶兵兩科以方鯁忤

時外調贛州知府減郡供應嘗持法於督撫憲司無所撓境多盜憲司令賞捕盜者詠誦其賊不實乃屏人謂曰吾知某非盜柰何枉之瞋目視捕者不能置對具吐實立反其獄憲司不勝忿與巡撫共擠詠詠再引疾去上不聽尋陞按察副使終陝西左參政

分

省人物傳

王鉞字公儀候官人嘉靖進士以南戶部主事左遷瑞金令廉明強幹政教兼舉勦鄉校聘名儒為羣士師

置田以供課藝費文教聿興鄰寇竊發貳多方備禦
時出偏師以挫其鋒賊不敢犯遷東平知州

府志

趙勳字彛伯番禺人由鄉舉嘉靖間知瑞金均徭役興
學校修邑志建雲龍橋委賑龍南信豐存活甚衆安
遠黃鄉賊葉金糾衆剽掠勳奉督撫檄往諭單騎入
賊所推誠慰撫縛倡亂者以獻一方晏然擢授御史

同上

阮悉懷集人由鄉舉知雩都性敏決察奸摘隱吏民畏

服邑賦役不均數十年民受其累悉力為清除又捐
置學田資諸生膏火至今祠祀之

縣志

胡明通羅田人嘉靖鄉薦知信豐縣值歲歉設法賑饑
益以常俸退賊弭盜有奇功三載考績保留復任陞

金華府通判

湖廣通志

潘翊錢塘人舉人嘉靖庚戌令寧都才識敏練優於治
劇縣無驛遞過客夫馬責之民間翊首立官船官馬
今為定例有罹於法者託吏餽金翊嚴拒置於法陞

沅州知州 同上

盧寧字忠獻南海人嘉靖甲辰進士丁未知興國縣設
匭於門務求已過察民隱縣有虛糧千六百石民苦
賠累多逃竄寧履畝清丈正經界平等則民力稍紓
當道有難決事必諮焉遷潼川州守 豫章書

雷上儒字應聘嘉魚人嘉靖進士歷郎署壬戌知贛州
當辛酉之亂賊氛方揚徵發旁午上儒從容應之未
嘗詘乏督府志在滅賊慮州人之為賊耳目也設匭

轅門以來告密時賴民黎氏劉氏趙氏先世有田土
於龍南適鄰賊巢仇家遂舉其名指為通賊逮捕下
獄將戮之以徇上儒請即訊不可請頌繫緩決不可
明日且出旗牌縛以赴法上儒趨入反覆陳說泣數
行下督撫為之感動良久起謝曰君誠篤君子也豈
欺我哉遂釋之今各姓子孫立木主祀之

安志

黃庚字文斷大埔人嘉靖進士乙丑由部郎守賴練識
長才察姦摘隱吏民畏服草沿門火夫雜役修復書

院議建定南縣治歷遷福建副使

府志

吳誠字明卿瓊山人正德己卯舉於鄉嘉靖乙未為龍南令釐夙弊四十餘條治聲赫然沙頭賊徐守沐僭號倡亂官司不能制謝鉞李鑑者王文成勦三泖時用之以撫輯阡洞頑嚚者積久多翫法誠廉得其狀召至出軍門檄示之曰將逮戮汝皆叩首請命誠曰能擒沙頭自効者貫罪鉞鑑敬諾即誘守沐擒捕之境內晏然所著有雁峰詩集

同上

趙承謙字德光常熟人嘉靖進士任贛州推官贛俗囂其豪仰刀筆而食以間把持富人長短稍不給輒文致其罪而黨更迭為証佐承謙至廉得其狀杖而出諸境一郡稱快攝贛劇盜劫尉去欲挾以攻縣承謙從兩吏單車逼盜壘曉諭利害盜叩頭請死送尉出又攝寧都當賑而御史行部至承謙曰吾不忍饑民以易御史權也畢賑而往司理三年以強項故僅擢南吏部郎歷官至參議

弇州史料

陳梁字伯棟涇陽人舉人任贛州府同知時有賊僭偽號衆數萬掠郡縣上官委梁往討梁以計誘執賊百餘人又遣人分諭諸賊使解散賊黨悉平城南章江人病徒涉梁作石橋人便之稱陳公橋

陝西通志

李夢周字希道海門人嘉靖癸未進士知寧都縣土俗好鬼事五王廟歲市子女代牲周火其廟併毀諸淫祠有勢家橫里中周置於法籍所奪田歸之民遂為所中傷解綬歸及卒貧不能殯

江南通志

陳大綸字伯言南寧人嘉靖己丑進士嘗受學于陽明先生知寧都咨詢民間利病亟為興除賭博者痛繩以法創立社學命塾師教童子歌詩習禮時行獎賞

風俗一變

府志

李丕顯字憲文長樂人嘉靖乙未進士由南道御史補贛州清恬不擾抗直無阿巡按御史行部有所督過及審讞輕重不相得必爭之不少徇會亢旱為民禱雨暴赤日中邁疾竟不起喪車就道百姓攀號哀思

同上

應本泉永康人嘉靖間任安遠主簿時三巢賊出劫無
虛歲本泉領兵捍禦親冒矢石不避艱險與士同甘
苦累有功績陞永新丞行日民遮道送之

安志

雷塾建安人嘉靖間任石城典史時流寇攻圍縣城塾
雨夜跣足巡邏厲衆堅守尋用計破賊邑賴以全

同上

王春復字學牧晉江人嘉靖戊戌進士先令泰和有惠
政比守贛益簡靖不擾丁艱去起復還故治郡人相

慶丙辰大水春復乘筏拯溺所活甚衆未幾有大木
之役條上便宜視諸府費為省時流寇覘知督木者
有積貲從石城越會昌將薄雩都督府遣二材官偵
賊為所執遠近洶洶春復提兵出結營四十里外惴
以先聲民聞守至遠近來集賊氣阻釋二弁遁去累
官貴州按察使

福建通志

廖憲大田人少遊吉水羅文恭洪先之門由鄉貢倅虔
刻厲清修精勤職業僚長貳敬愛之署縣權闕秋毫

無染嘗修信豐邑志滿考陞知州去之日乘小舫惟

竹簾一肩圖書數卷

府志

海瑞字汝賢瓊山人舉人為淳安令陞嘉興通判未行

以忤直忤部使者意據他事謫調興國縣值辛酉兵

燹後十室九空瑞勞來安集漸復舊業邑苦浮糧則

述八事上當道懸賞捕盜捐俸修學又植松以護水

口挿杉以興民利飲水茹檠一如淳安云

安志

按海忠介集知興國縣時有興國縣八議一篇皆

陳江西興國之前志據明史稿謂瑞謫湖廣興國州判官非贛州興國縣令反以安志為附會此失考也今八議采載藝文中

林萬潮字養晦莆田人嘉靖進士補贛州推官謙冲周慎斷獄務求其生攝興國重建安湖書院聚諸生課業其中信豐大水奉檄往賑冒暑行村塢中計口給授凡活數千人竟以疾卒官

府志

李鳳朝貴州人嘉靖歲貢任信豐主簿時三巢賊賴清

規等屢掠城下鳳朝督兵出戰屢破之賊入青邨谷
距山逆戰鳳朝奮力先登為賊所害數日得其屍顏
色不變邑人哀之呼其山為主簿腦

信豐志

葉夢熊字男兆歸善人嘉靖進士由福清令入為戶部
主事改御史以諫降邵陽丞累遷贛州知府平黃鄉
賊遷浙江副使累官巡撫貴州尋改陝西

白志

李多祚字可久石首人嘉靖舉人知安遠縣時三巢構
亂大石小石伯洪三保俱被脅從而腰古丹竹樓等

保又皆招撫新民多祚調度有方駕馭得策每遇寇警鼓率鄉勇捍禦新民亦肯自効下厯之役獨當一面擒斬招降以千計寇平三保流移千餘家盡歸業築城南逕以據要害其功尤足垂久遠云

安志

龔有成嘉定人嘉靖舉人自詔安令調龍南所在賊擾瘡痍未復有成愛養招徠境內改觀督撫奏留為本府同知仍管縣事協謀進勦高砂下厯賊壘蕩平地

方德之

府志

呂若愚字可明浙江新昌人嘉靖進士知瑞金縣恢復
書院闢宣文門增修公署橋梁祠宇時紅白蓮邪教
煽惑愚民捕其魁寘於法餘皆解散終駕部郎中

同上

陳瀾麗水人嘉靖舉人知信豐縣清鯁嚴明下厯之役
督撫移鎮信豐兵將四集取辦倉卒瀾一身任之措
處次第上不廢事下不損民新立定南縣督撫疏薦
詔加五品服俸卒於官

同上

沈文淵字上甫丹徒人由鄉舉萬厯四年知長寧邑當

新造城池學校縣署一身勦始董率勤勞已而定里
均糧衡文作士團兵戍守諸務漸次就理考滿去卒
於途百姓哀慕之

長寧志

崔允升字吉山海門人由舉人萬厯十一年知會昌下
車即草冗役恤里甲凡不便於民者悉除之捐修城
垣公署纂修邑志文詞典贍卒於官

會昌志

劉昌祚武進人由鄉貢知雩都操履清白邑俗溺風水
有停喪數十年不舉者刻日諭之畢葬又翦除上吉

鄉劇盜高魁一等四境寧謐陞金華通判

府志

黃克纘字紹夫晉江人由進士萬歷十七年守贛值歲大侵發倉以賑更因舊學之製而新之鳩工庀材而以廩中餘粟給役人食民皆競赴不期月迄工陞四

川提學

同上

陸化淳字君復常熟人萬歷進士丙午守贛州法嚴政舉別駕某以兩橋稅羨四千金貯於府化淳固辭值病革別駕往省微言諷及則伏枕謝曰吾無事此家

人復請以手麾之遂瞑士民為之巷哭

府志

沈振龍字潛起秀水人萬厯進士天啟二年守贛州閩
寇適發虔撫議徵兵焚郭外居民閉城堅守振龍不
可曰吾有備矣就所立里甲部伍約勒之張旗幟申
斥堆寇不敢至避難者麇集軍士輒縛上募府指之
為寇振龍按其妄多所開釋忤上僚意以軼盜劾罷
贛人懷之

同上

祁汝東山陰人由鄉舉萬厯甲申為贛州同知聽斷公

明用法平恕獄難鞫者當道悉委之以屯田高下分等則以定運軍年限衛所至今賴之終兩淮鹽運使

同上

嚴遵試字行之賀縣人由鄉舉萬厯間為贛州同知遇事摘發推見至隱盜賊竊發禽制有方歲旱禱雨徒步暴日中東南瀕河居民苦板木牙行則為蠲其役在任四年歌謠盈路

同上

李熠號鄴郁涉縣人萬厯間通判贛州榷稅凡偵夫按

卒一切罷去務為寬疎節目或縱舍微利過者樂之
後南陽李若素判郡筦榷亦能恤商施惠稱二李云

同上

吳宗周字熙偉福建南安人由鄉舉知興國潑濊二水
自城北合流過縣西舊為浮橋以濟歲久圯宗周至
捐俸訖工鄒元標為之記徵輸有法買田數十畝以
資軍黃二冊解費設白沙渡民不病涉邑人思之

潑

水志林

蔡鍾有字恒卿同安人萬厯末由鄉舉知興國嫻於吏職能得物情屯田漸蕪府檄召民墾荒給帖為業已墾者軍復爭之前令何應彪盛陳刁軍害民虔撫李汝華深然之未久復爭郡守金汝嘉頗庇軍鍾有條陳源委言多切中汝嘉不能奪葺撰邑志手自編纂迄今文獻不墜者鍾有之力也

同上

陳履忠字公亮號鳳阿昆明人崇禎進士知贛縣有幹濟才建社倉以備荒廉泉之側舊為養濟院履忠初

為書院以興文教肇舉廉泉大社鼎革後臺榭傾圮

獨書院不廢

府志

王六如字凡夫黃岡人崇禎甲戌以舉人知信豐時寇盜蜂起兵役數發例舉縣中富戶當之輕重責成一入輪役經年無不破產者六如請於上官照糧編派黥者不得規避倉庫本吏胥所司反外僉里民六如釐正之經費取足糧戶典守仍歸本役樹碑儀門永以為式邑人深感其德立祠祀之

同上

冒夢齡字汝九如皋人選貢知會昌縣萬山窮僻吏治
墮窳夢齡立意振刷造橫江橋以濟民新學宮以課
士士民懷之

江南通志

馬調鸞平順人崇禎貢任石城知縣時流賊肆橫調鸞
增修城垣團練鄉勇守禦有方地方久安陞懷慶通

判民為建祠立碑

山西通志

金廷韶字二如山陰人進士知贛縣贛營兵變撫道皆
不敢出廷韶於倉卒之時數言撫定甲申以後匿影

山澤不復再見

浙江通志

國朝

曹廷偉字文雄陵川人順治初恩貢授定南知縣會金
逆兵至殫力捍禦不屈以死長子翰明次子諸生際
盛從子翊明僕曹伏新凡十一人皆遇害父子主僕
同時死義聞者為流涕賊平

贈江西按察司僉事子祭葬蔭一子入監

山西通志

郭自修絳縣人順治元年恩貢授安遠知縣調石城縣

土寇竊發城陷罵賊不絕遂遇害

同上

郎永清號定菴廣寧人以大臣子弟選就國學順治癸巳擢知贛州府贛自丙戌城破加以閩廣連歲用兵民相率徙避永清勤招徠嚴約束復業者日衆時李定國犯梧桂郝尚九在潮官兵進勦以馬匹休飼於贛永清慮兵入城百姓騷動預區南門教塲地為營柵廩芻糧畢備而自往萬安迎哈朱二大將軍陳說宇內新定民為邦本之義將軍至見供億整飭則大

喜下令不許一兵入城瑞金石城寇掠最劇之地為
難民營構室廬收瘞胔骼興瑞定三邑洊饑發大濟
倉粟往賑全活無算贛諸生王曰旦為盜所引酷刑
誣服永清廉其枉出之又雪興國民廖安民之獄在
官四年兄子廷佐巡撫江西例宜引避贛士民伏虔
臺乞留候代又一年丙申乃行贛人懷其德為祠祀
之

府志

錢江字珥信嘉興人順治進士知瑞金縣均里役貧富

無偏修復雲龍橋民不病涉有劇盜陳許二姓又僧
超忠聚僧兵千人據銅鉢山尤橫江誘擒超忠密布
方畧破許賊于羅漢巘進兵大柏江捕獲陳姓于烏
橋嶺一時盜魁巨猾盡被擒無倖脫者行取兵部督
學山東以得士稱

同上

黃之麟字瑞白宿松人順治十年授興國令興界閩粵
久為賊踞麟招降賊王大勇滅賊孫可貴勦海窖洞
賊曾拱宸等墾田糧二千八百石有奇民士作十頌

志之

江南通志

蘇峻大順天人以貢生任贛州推官順治戊子諸邑猶未靖雩都渠帥曾斌羅聚奎等嘯聚禾豐山謀以二月窺城劉虔撫武元發兵勦之偵者道聞城中士民與賊通統兵諸將議先屠城而後擊賊峻大適以他事過雩雩民焚香城上自訴其無辜呼籲之聲聞十里外峻大兼程抵郡白其事力保雩民不反武元然之遣飛騎諭諸將毋妄殺良民持二金卮為信乃嘗

讌會文武衆所識者也遂撤兵獨勦禾豐先是屠城
之令以某夜夜分砲三發為約城中人皆擊豕祀先
聚食醉飽以待倭礮已二發哭聲殷地飛騎至得全
皆慶更生為祠以祀蘇公

雲都志

吉永迪字太邱陝西人進士順治庚寅知信豐時議勦
安遠砂舍賊練鄉兵於新田賊聞令離縣百餘里謀
從他道乘虛劫城永迪偵知之乃夜伏兵於龍頭逕
賊至大敗之壬辰九月復奉檄勦黃石砦副將楊栗

賈三榮久戰無功永迪書諭以威德賊聽命永迪趨
勇絕人嫻兵畧數以討賊自効所至有功

信豐志

趙夢仁字卜生河南人順治辛卯以進士知興國邑中
兵燹之後絃誦不聞夢仁振興文教諸生匿不赴試
召之庭與之講論文藝由是士知向學田畝荒蕪募
民墾闢瘡痍漸有起色不二載以憂去

潯水志林

蔡國相仁和人順治八年任定南典史九年十月十五
日廣賊數萬夜衝定邑國相領鄉勇力戰殺賊數十

衆寡不敵為賊所擒尚徒手搏賊而死

府志

郭堯京字平野高陵人順治十年由鄉舉知石城殘燬
之後刻意興釐葺學宮繕城堞造警鋪先是大盜陳
其綸與東關盜黃允會踞砦未散鄰界羅漢巖劇寇
沿鄉肆劫堯京募鄉勇伏險堵截其綸授首餘賊潛
遁其俘掠難民悉獲放還民賴以安在任八年陞祁

州知州

同上

黃里字君畝湖廣人辛卯貢士順治十二年知贛縣見

荒缺十之七繪圖泣請題免荒糧一萬三千缺丁八千七百留給贛鎮兵米抵作贛漕至今兵民食其德

同上

沈元箕字子弓吳縣人順治十二年由恩貢知長寧縣先是閩人朱家垣託歸順安揮邑中結土豪分立十營閭井有事必關白而後行視令尹若贅旒為害者十年元箕至以情形具告虔撫蘇弘祖弘祖乃以諸營為之首者畀以材官等銜分隸他處資汛防漸次

解散所奪民產盡給主者大害以除

同上

李佑之字在公長山人順治十四年以選貢知雲都粵賊范日星嘯聚東鄉即用所撫之衆擒之己亥秋海寇蠢動江左李玉廷復叛督府遣將攻圍賊壘佑之親歷行間密捕間諜於是賊之驍將張寧閻勝等先後投誠玉廷宵遁獲之於九山田舍

同上

王枚字卜子鄞縣人戊戌進士康熙壬寅令贛時漸承平流遺復業荒蕪稍稍成熟有議陞科者枚喟然曰

藏富於民古之道也吾不能為惺惺之利國遂不上
聞振興文學詩賦清麗越俗尤工書嘗縷竹絲為筆
以書蒼鬱盤硬號四明書格

同上

孔興訓字覺所山東曲阜至聖裔康熙甲辰守贛刻厲
振作懲姦剔蠹胥徒畏之若神歲己酉安插閩海降
兵屯田於贛諸屬興國屯兵洵欲為亂興訓親往
履歷畝尺寸審度俾兵民各有其土居官九年民至
今思之

同上

井陘字素菴北直文安人由進士康熙七年知長寧莅
治精察能任繁劇時董總制衛國檄各縣解運豫備
倉穀往省協濟厥詳陳搬運利害免解費一千八百
餘兩康熙壬子閩寇入境厥調選鄉勇委典史鄭之
鵬會勦大敗賊於牛門山

長寧志

張澈字渭有黃梅人順治甲午副榜康熙戊申知雩都
政務簡靜甲寅閩變起其部因屯壑居興國者響應
助亂據厓石山山接雩之北郊鈔劫長樂里天華山

乙卯擁衆叩城下澁閉城靜以待之城中無兵賊還見城上旗幟干櫓隱映森列信宿退去一時稱神助莅事十有四年陞雲南雲龍州知州

府志

宋必達字其在黃岡人順治辛丑進士康熙乙酉令寧都清泰懷德二鄉久罹寇燹多流移必達請盡蠲逋賦以徠之漸次開墾甲寅滇逆部將韓大任兵犯吉安虔屬震恐乃倣王文成保甲法簡習義勇團練約束汀州賊奄至縣境必達揮義勇橫擊之賊大奔解

圍去

韓英有懷堂集

李德明字瑞毓巴陵人任贛照磨康熙甲寅六月石城陷於閩賊總兵劉進寶帥師復之德明押紅傘大礮佐軍前令以陷城去撫軍委攝篆事石城近汀而遠贛汀久為耿逆有德明預為保障計增築城堞城中無井汲於江每被圍軍渴乃堰江水入城浚池以蓄之又週城鑿墮偽將軍陳益擁衆來攻氣欲吞城德明揮兵一戰馘之邑人始無攜志丙辰二月滇逆高

某陷吉安羣賊聲勢日熾偽將軍劉應麟以書誘降
不聽囚其使應麟怒帥兵三萬圍城時外援不至德
明與民死守鄉勇名畢佛者中礮碎腦語其伍曰公
矢忠報國吾受公厚恩死無恨若等謹守堞毋為賊
乘言訖而絕德明哭而殮之衆皆感激奮呼請効死
德明知人心可用乃出戰五戰五捷自是汀寇不敢
復睨石城矣德明視事三載禱雨輒應人稱曰李霖
其受代行也生祠祀之

府志

郭毓秀字鍾山陝西人舉人知贛縣事時康熙甲寅耿
孫叛於閩粵大兵出入多道贛有蜚語謂王田村民
通逆主兵者謀殲之毓秀言於佟撫國禎哲鎮爾肯
曰

國初兵寇交訐贛四境蕭索獨田村驚谿一二井里能
自保聚遂以蕃庶遽以大逆誣之恐非惠養元元意
也國禎爾肯皆然之毓秀即馳入田村令毀其壘培
而供輸芻糗倍於他所議得寢越三年以顛撲忤上

官去里人至今述其事猶有墮淚者

同上

王維威富平人任石城典史康熙甲寅石城被閩逆攻圍維威視事甫三日與照磨李德明協志守禦晝夜登陴二旬乃解丙辰劉應麟以盛兵至維威與戰破之嘗巡城矢集臂弗為動三載寇禍卒保危城勞勩著焉

石城續志

錢志泗山陰人興國典史甲寅之變屯弁石昭最先發六月虔撫遣兵勦之昭與朱明拒戰於陳屋園志泗

饋餉行至江背峒寇猝至襲其後遂被戕是冬郡丞

顧岱來諭降始歸志泗首事聞蔭一子經歷

潞水志林

劉治國順天良鄉人康熙甲寅由蔭生知信豐丙辰六

月賊王割耳李善長率衆萬餘攻城治國將家子有
膽畧增修城濠督兵守禦被圍數月贛兵救至賊乃

退

信豐志

萬蹶生字文若江南武進人由副榜康熙甲寅令寧都
初下車減徭稅耗羨一粟一薪之費不以取諸民三

逆變起吉汀之間皆賊黨所潛伏俗故好亂蹶生踵
前令宋必達鄉勇之制部署民兵而訓練之丁巳韓
大任竄入縣境蹶生多方禦之遂不犯城既而郡兵
與省會兵皆大集蹶生支應有方民得不病越明年
以事黜既解組猶居寧累年無以自食士民羣資給
之

魏禧文集

王璋字豐年浙江人康熙初知興國縣縣舍自戊子燬
於兵璋特建之有幹才多所興革己酉部議閩降卒

屯墾贛屬邑璋恐聚處生變且病民請於守按籍授
田析置諸鄉以散其勢有冗法者按律繩之皆歛戢
以鹽政罣誤去

贛州府志

李楓韓城人康熙進士知會昌時田多荒蕪民賦逋欠
楓為申請蠲豁去官無歸資士民醵贈悉不受

陝西

通志

黃惟桂字木菴直隸真定人以舉人知興國康熙丙辰
至江西韓大任寇據吉安邑中罹寇已四載惟桂招

懷撫貳大任戰敗竄入寧都萬安瑞金間皆假道興
境惟桂率民兵登陴戒嚴賊去則官兵之躡賊者至
牲醴犒賚得其歡心乃上勦撫機宜先撫寶石次撫
浪川又次撫鯉婆諸寨皆降獨厓石寨朱明狡惡負
固乃陳狀於宣義將軍尚之義重兵困之四閱月始
自縛下山撫局乃成值山水暴漲齧城繼以旱災發
倉賑饑祈霖禱疫備嘗艱瘁甲子春陞貴州永寧知

州

藏水志林

楊允和號育菴遼東人康熙間知安遠縣歲饑捐俸賑
施存活以萬計邑俗溺堪輿好以父母枯骸屢更葬
地名曰檢金允和力禁并著木鐸餘音一書刊布之
俗始革邑多山田桔槔有難施者製龍骨小車以肩
水灌溉農民至今相沿其法利賴甚遠又創立義學
延師教授故士民咸頌其德不忘云

楊椿撰誌銘

江西通志卷六十五